

## Mark Riwana Aiaina, Mark i girugirumia

### *Pariverena*

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana ega ita riweta. Wate tauviararamana e ririwa da Mark i girumi. Mark, lamna ega Apasol, wate tauviararamana magamagaui i notai da tauna, Peter maiteni au Rome i mae. Ma Peter, Iesu ana kaua ma ana viararamana magamagaui Mark i riwei. Anina ma Mark wei riwana i girumi da tauvitumaiana au Rome ita aramanei, Iesu aiwai i kaei.

Riwa karena i girugirumia e viviegeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kaua magamagaui ita kaei. Wei kauai tana inanai maranai: e viviararamana; ma arua-apoapoei e viviagaiana-opunei; ma rava doridoriai e vivilawani; ma go'apoapoe e notanota tawanei. Mark, Iesu ana nola ma ana kaua i girumi ma ega ana viararamana ita girumaguratei. Mark i viegeta menanare Iesu au korosi i raige da rava anatapui ita vilawanai ma God menanare, Iesu iragalei i vovaimairini.

*John Taubabataito, Iesu ana aninae  
i vovokaukauei*

*(Matthew 3:1-12; Luke 3:1-18; John 1:19-28)*

<sup>1</sup> Wei lamna Iesu Keriso Messiah God natuna Riwana Aiaina karena.

<sup>2</sup> Wariāga peroveta Isaiah i girugirumia nanare:  
 “*Ona rautaniğanal! Au peroveta au naom ana paritawanei da am aninae ina vokaukauei.*” (*Malakai 3:1*)

<sup>3</sup> <sup>✡</sup>“*Peroveta au mutulua e viviğoreğore: Taumi BADA ana aninae ona vokaukauei, ana eta ona vovai-jijimani!*” (*Isaiah 40:3*)

<sup>4</sup> Ma taupariverena John i nei au mutulua da rava i bababataitoi ma God riwana i jimejimei i pa, “Ami ġo’apoapoe ona voterei, ma ona mae-taviremi God awarina ma ami ġo’apoapoe ina nota-tawanei ma ana babataitoimi.” <sup>5</sup> Ma rava anatapui Judea au paratana ma au Jerusalem i nae da John ita rautaniğanei. Maranai ai ġo’apoapoe i rupeni, John, taui i babataitoi au waira Jordan.

<sup>6</sup> Ma John, *kamel* aparana metametanana i oteoteni ma ana tairoro ġamoġamo opina. Ana lam kapau ma manigewa. <sup>7</sup> Ma tauna, rava i ririwei i pa, “Rava au muriu e nenei i ġetelara, eġa me tau. Eġa tagotagogiū da ana ae uma ġuravana ana rupeni. <sup>8</sup> Tau wairei a babataitoimi, wate tauna, Arua Vivivireinei ina babataitoimi.”

*John, Iesu i babataitoi  
 (Matthew 3:13-17; Luke 3:21-22)*

<sup>9</sup> Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi. <sup>10</sup> Ma maranai Iesu wairei i ġegetai, i ’nana da mara i wanatawanei ma Arua Vivivireina me gabubu i ġairai. <sup>11</sup> <sup>✡</sup>Ma God ponana

---

<sup>✡</sup> **1:3:** Isa 40:3    <sup>✡</sup> **1:11:** Gen 22:2; Isa 42:1; Mrk 9:7

marei i opu ma i riwa i pa, “Tam, tau natu au nuavaina ma u vinuaiainiu.”

*Satan, Iesu i raelari  
(Matthew 4:1-11; Luke 4:1-13)*

<sup>12</sup> Ma lamna au murina God Aruana Vivivireina Iesu i paritawanana-opunei au mutulua. <sup>13</sup> Ma au pom 40 au mutulua i mae. Ma Satan, tauna i raelari. Ģamoğamo ġaiġaiawai nai au dobuna i mamae ma God ana anela marei tauna i paini.

*Iesu, lebalebaġai ruaġa ma ruaġa i raukwatuei  
(Matthew 4:12-22)*

<sup>14</sup> Ma gulau Herod, John i pani. Ma muriae Iesu i nae au Galili da rava awarii God Riwana Aiaina i jimei. <sup>15</sup> Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo’apoapoena ona rupeni ma ona mae-tavirem ma Riwana Aiaina ona vitumaġanei!”

<sup>16</sup> Mara tagogi Iesu Galili topana au gerana i bababara nae. Ma lebalebaġai ruaġa i ’nanai, Simon\* ma ana tevera Andrew au topa i rarauagida. <sup>17</sup> Iesu i riwei i pa, “Ona nei ma ona votaġotaġoi. Ma me marina iana o tutuarui; nanare, ana viararamanimi da rava ona tuarui da ina vitumaġaneu!”

<sup>18</sup> Ma maratogogi ai agida i voterei ma Iesu i votaġotaġoi. <sup>19</sup> Ma taui au gera i verau-nae. Iesu, Zebedi natunatuna i ’nanai, James ma John ai au waga ai agida wanawanarorona i vokaukauei. <sup>20</sup> Ma maratagogi taui i ġorei, “Taumi ona nei ma

---

\* **1:16:** Wavana ġelauna Peter

ona votaḡotaḡoiu!” Ma taui amai Zebedi<sup>†</sup> ana taunola maiteni i voterei ma Iesu i votaḡotaḡoi.

*Iesu, arua-apoapoena rava awarina i viaḡaḡana-opunei*

(Luke 4:31-37)

<sup>21</sup> Iesu ana Tauvotaḡotaḡo maiteni i nae au Capeniam.<sup>‡</sup> Ma au Sabat, Iesu i rui au pari numana ma God Riwana Aiaina, viararamanana i vikarei. <sup>22</sup> Tauna ana rewapanana i viararamana eḡa me mai Jew ai tarawatu babadai § nanare. Ma taurautaniḡana ana viararamana i baei.

<sup>23</sup> Maranai Iesu pari au numana i viviararamana ma oroto arua-apoapoena orana i ruiruinia i garara <sup>24</sup> i pa, “Iesu Nasaretei, aiwai e ḡoeḡoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

<sup>25</sup> Ma Iesu riwa bagibaginei i riwei i pa, “Ma genuana! Nai orotona ma opu-tawanei!”

<sup>26</sup> Ma arua-apoapoena orotona i viaikwajiei ma ponana i rata, i garara ma i opu-tawanei. <sup>27</sup> Ma rava anatapui i bana-kauei ma taui ava i vitarapiri, “Wei aiwai? Wei viararamana vouna ma ana rewapanana maiteni! Wei ravana awarina rewapanana e mamae da arua-apoapoena i riwei ma tauna i vovoteletelei!” <sup>28</sup> Iesu nolana, maratagogi i tua Galili au anatapuna.

*Iesu, rava maḡamaḡau i vilawani  
(Matthew 8:14-17; Luke 4:38-41)*

---

† **1:20:** Eng. Zebedi. ‡ **1:21:** Eng. Capernaum. § **1:22:** Wariaḡa BADA, ana Tarawatu Moses i verei mai Israel aubai.

**29** Nai marana pari numana i opu-tawanei ma ana tauvotaḡotaḡo maiteni i nae Simon ma Andrew ai au numa. James ma John maiteni i nae. **30** Simon poiana wavinena ini ġugurana ana au animatave i matamatave ma maranai Iesu i ġeta ma numa ravai, tauna i pariverei. **31** Tauna i nae wavine awarina, nimana i vojjini ma i voagui da i vomairi. Lamna maranaina, ini ġugurana i voterei ma wavinena, taui i paini.

**32** Ma au bigai madeḡa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.\* **33** Ma rava anatapui nai au melagaina i vitagogiei numa au metaetana. **34** Ma Iesu, maġamaġaui ai doria nununai i vilawani ma arua-apoapoe maġamaġaui rava awari i viāġaġana-opunei. Ma arua-apoapoena i aramanei da tauna anina God natuna ma lamna aubaina taui i viġaei da i genuana.†

*Iesu au Galili i raugugula nae  
(Luke 4:42-44)*

**35** Ubaubanai boibogī, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari. **36** Muriae, Simon ana rava maiteni i nae da i baiei. **37** Ma maranai Iesu i nelāḡai, ma i riwei i pa, “Rava anatapui e baibaiem.”

---

\* **1:32:** Madeḡa ina neulai au murina anona lauvitau ana mara damona. Mai Jew ai lauvitau ana mara au Friday madeḡa e neneulai au murina e vivikarei da Saturday madeḡa e neneulai au murina e vorovorovei. † **1:34:** Iesu i aramanei, mepa da ita kaei da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viġavia, me taui e vivinua-notenotei nanare. Jhn 6:15 ma inanai.

**38** Iesu i paribelei i pa, “Tana nae taon ġelaui au ġereġere, ma kampa maiteni God Riwana Aiaina ana raugugulei. Tau wei lamna aubaina a nei.” **39** Ma Galili au anatapuna i naeni ma pari au numai i raraugugula ma arua-apoapoei i viopuni.

*Iesu, oroto opi doriani i vilawani  
(Matthew 8:1-4; Luke 5:12-16)*

**40** Anina ma rava awarina opi doriani, i nei Iesu awarina ma au naona i peu ma i raudune ma agu i vibagħei i pa, “Mepa da ma ġoei, anina da ma viaiainiu.”<sup>‡</sup>

**41** Ma Iesu nuabola orana i oai ma urana i viloloi da i vodadani ma i riwa i pa, “Anina a ġoegħoei, ma aii!” **42** Ma maratogogi opi-doriani, oroto i voterei ma tauna i aii me. **43** Anina ma Iesu i riwana-guratei i pa, **44** “Tam ma nae! Aiwai i tuputupua awarim, eġa rava ma vieġe! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauei da ina vimataira taui awari! Pirisi pulo tauapuina ana vianina ina verei da tam u lawana.”

**45** Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa eġa rava ita mamaelana kampa i nae. Wate rava mepa maemaei i nei Iesu awarina.

---

<sup>‡</sup> **1:40:** Mai Jew ai Tarawatu e ririwa da rava lepeleperai, taui miramirai me dobu ġelaui - Jentail. Mai Jew amapo nai ravai eġa ina vodadani. Rava miramirai eġa maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimelei ma rava maiteni ina mae ma ina taparoro.

## 2

*Iesu, oroto gwaḡagwaḡana i vilawani  
(Matthew 9:1-8; Luke 5:17-26)*

<sup>1</sup> Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai. <sup>2</sup> Ma rava maḡamaḡau i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei. <sup>3</sup> Nelara ruaḡa ma ruaḡa, oroto gwaḡagwaḡana rasirasiei i avarai da i neiai Iesu awarina. <sup>4</sup> Rava i maḡa guratana ma eḡa tagotagogina da ita neiai Iesu awarina, lamna aubaina da tetelei i amḡaena da au poewa ma gavogavo i bauni ma kampa gwaḡagwaḡana ana rasirasina i tere-ḡairei Iesu au naona. <sup>5</sup> Ma Iesu, nai ravai i 'nanai da ai vitu-maḡana i rata, lamna aubaina gwaḡagwaḡana i riwei i pa, "Natu, am ḡo'apoapoei, a nota-tawanei."

<sup>6</sup> Anina mai Jew ai tarawatu babadai ġelau kampa i kiakiala, au orai i vinua-notanota i pa, <sup>7</sup> "God ainelana ḡo'apoapoei e notanota tawanei. Aiwai aubaina wei ravana nanare e bababani? Tauna, God e vivijibogi ma e ririwa da tauna, God nanare."

<sup>8</sup> Maratagogi, Iesu Aruanei ai nota i vaia ma i riwei i pa, "Aiwai aubaina wei kauai o vivinua-notenotei?" <sup>9</sup> Metauna i telatela: 'ġwaḡagwaḡana ata riwei, 'Am ḡo'apoapoe a nota-tawanei.' Bo ata riwei, 'Ma vomairi, am animatave ma vaia ma ma babara?' <sup>10</sup> A ḡoei da taumi ona aramanei da Rava Natuna au dobu ana rewapani e mamae da rava ai ḡo'apoapoe ina nota-tawanei ma ina vilawani." Ma gwaḡagwaḡana i riwei i pa

**11** “A riwem, ma vomairi, am animatave ma vaia ma ma nae au numa!”

**12** Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, “Tauai ega melanai kaua wenanare ata inanai!”

*Iesu, Levi i kwatuei  
(Matthew 9:9-13; Luke 5:27-32)*

**13** Iesu, Capeniam i voterei ma Galili topana au gerana i bababara ana tauvotagota go maiteni. Ma patara i nei awarina ma tauna God riwana viararamanana i vikarei. **14** Ma i verau-nae aburuna ma Apius\* natuna Levi i 'nanai, ana bagibagi au gabuna i kiakiala ma *tax* i tamitami Rome gabemanina aubaina. Iesu i riwei i pa, “Ma votagota goi!” Levi i vomairi ma i votagota goi.

**15** *Tax* tautami ma go'apoapoei ravai ma gama gauai, Iesu ma ana tauvotagota go i votagota goi. Ma anatapui, Levi ana au numa i kiala gogona ma i amam.† **16** Tarawatu Babadai gelau lamna Pharisi, ma taui i 'nanai da Iesu *tax* tautami ma go'apoapoei ravai maiteni i amam. Anina ma Iesu ana tauvotagota go i riwei i pa, “Aiwi aubaina Iesu *tax* tautami ma go'apoapoei ravai maiteni e amam?”

**17** Ma maranai Iesu wei riwana i nononori ma taui i riwei i pa, “Rava lawalawai, doketa ega ita goegoei ma rava doridoriai, doketa e goegoei.

---

\* **2:14:** Eng. Alphaeus. † **2:15:** Moses, BADA ana Tarawatu i girumi ma mai Pharisi wei Tarawatuna i votagota go-kauei. Ma taui kaua waduboi amamai gariei maiteni i vovoteletelei ma i riwa da aiavoi Tarawatu ega ita voteletelei lamna taui rava apoapoei, go'apoapoe tau kauei.

Tau a nei āgo'apoapoei ravai aubai ma eāga rava jijimani aubai."

*Uji vitaraviravirana  
(Matthew 9:14-17; Luke 5:33-39)*

<sup>18</sup> Mara tagogi, John Taubabataito ma Pharisi ai tauvotaāgotaāgo i ujiuji. Ma rava īgelaui i nei Iesu awarina ma i vitara-virevirei, "Aiwai aubaina John Taubabataito ma Pharisi ai tauvotaāgotaāgo e ujiuji, wate tam am tauvotaāgotaāgo eāga ita ujiuji?"

<sup>19</sup> Iesu i paribelei i pa, "Taumi o notanotai da taui aiavoi i raukwatuei tavine ana au torela, ina mae lota bo? Egateni kaua! Maranai tavitavine vou orotona, taui maiteni e mamae, taui eāga ina uji. <sup>20</sup> Wate mara ina īgeta maranai tavitavine vou orotona ina vaitawanei ma lamna maranaina ana rava ina uji."

<sup>21</sup> Ma riwa e mamae, "*Tau kaua vouna a neiai eāga me taumi ami kaua wadubona nanare.* Eāga aiai ravana, gara vouniei gara au wadubona ina poporatui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata. <sup>22</sup> Ma nanare, eāga aiai *wine* vouna ina vaini da *wine* aniterenana wadubona īgamōgamo opinei au orana ina iwāgi. Mepa da ina kaei, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni<sup>†</sup>. Wate *wine* vouna, anina da *wine* aniterenana vouna au orana ina iwāgi."

*Iesu ana riwa Sabat aubaina  
(Matthew 12:1-8; Luke 6:1-5)*

---

<sup>†</sup> **2:22:** Wine e tuputupua ma puropurona wine ana aniterenana ina viaisikasikai

<sup>23</sup> Mara tagogi au Sabat, Iesu ana tauvotaḡotaḡo maiteni, *witi* wapuna au orana i nena. Ma ana tauvotaḡotaḡo *witi rovei* i vaini ma i amam. <sup>24</sup> Pharisi ġelaui i 'nanai wei kauana i kaukauei ma taui Iesu i riwei, "Ma inanai, ata Tarawatu e mamae da Sabat, lamna lauvitau ana mara. Aiwai aubaina taui e vovobagibagi?"

<sup>25</sup> Iesu i paribelei i pa, "Me peroveta i girugirimia nanare. David ana tauvotaḡotaḡo maiteni amiraġe ma aiwai i kuae? Taumi o iavi ma aiwai aubaina anona, eġa ota vinua-notenotei? <sup>26</sup> <sup>☆</sup>Pirisi Ĝeġetelarana Abiathar ana au mara, David, God ana au numa i rui ma palawa vovivirana i vaia ma ġelaui ana tauvotaḡotaḡo maiteni i verei da i ani. Moses ana Tarawatu e mamae da pirisi ava palawana e aniani."

<sup>27</sup> Ma Iesu ana riwa au damona i riwa i pa, "God, Sabat i kuae da rava voaguna aubaina ma eġa rava ita kuae Sabat voaguna aubaina. <sup>28</sup> Ona vinuanotenotei, tau Rava Natuna, lamna aubaina tau anina Sabat badana."

### 3

*Iesu, Oroto urana irairaġena i vilawani  
(Matthew 12:9-14; Luke 6:6-11)*

<sup>1</sup> Mara ġelauna au Sabat, Iesu i naeme au pari numana ma oroto urana irairaġena i 'nanai kampa i kiakiala. <sup>2</sup> Ma Pharisi ġelaui i ġoei da aiwaiei Iesu ita viwavui. Lamna aubaina i 'nana-taḡotaḡoi da oroto ita vilawani bo eġa au Sabat. <sup>3</sup> Ma Iesu, orotona i riwei, "Ma nei, au naoi ma mairi!" <sup>4</sup> Ma Iesu, ravai i vitara-virevirei i pa, "Sabat au marana,

---

<sup>☆</sup> **2:26:** 1Sa 21:1-6

metauna i aii: Aiaina tana kauei bo apoapoena? Tana vilawana bo tana viraġena? Tarawatu aiwai i riwei?” Ma anatapui i genuana. <sup>5</sup> Iesu ana amloġaiġaina i ’nana viravira ma i ’nanai da taui orai i bado ma nuanuana i bola-kauei. Ma orotona i riwei i pa, “Uram ma viloloi!” Ma i viloloi ma i lawana. <sup>6</sup> Ma Pharisi maratagogi i opu ma i nae Herod ana rava awarii\* ma ai oga i tarai da Iesu mena ita viraġenanei.

*Iesu, Patara awari i babani*

<sup>7-8</sup> Iesu ana tauvotaġo maiteni, taui i netawanei ma i nae au gera da ita vilauvitau; ma mai Galili patara ġaegħaena i votaġo. Rava maġamaġaui, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ġelaui waira Jordan taon au babagelauna, Taia taon ma Sidon taon,† taui anatapui i nei Iesu awarina. <sup>9-10</sup> ⋆Iesu, rava maġamaġaui i vilawani. Ma lamna aubaina doridoriai maġamaġaui i viviamdudu ma i ġoei da tauna ita vodadani. Lamna aubaina ana tauvotaġo i riwei da waga i vokaukauei. <sup>11</sup> Maranai, arua-apoapoei rava au orai maemaei, Iesu i ’nanai ma au naona i peu ma i garara, “Tam God Natuna!” <sup>12</sup> Ma Iesu taui i viġaei da avena ita vieġa da tauna aiai.

\* **3:6:** Herod ana rava anona lamna mai Jew ai boru, taui aiavoi Rome gabemanina i vovoagui. Taui ai bada wavalatona Herod Antipas. Mai Jew maġamaġaui ma mai Pharisi maiteni, i notai da Herod ana rava taui tauvibenabenam ai rava au oienā awarii.

† **3:7-8:** Eng. Tyre & Sidon. Wei ravana eġa mai Jew. ⋆ **3:9-10:** Mrk 4:1

*Iesu ana Apasol 12 i vinei  
(Matthew 10:1-4; Luke 6:12-16)*

<sup>13</sup> Anina ma Iesu i ġae au ola ma ana ġoanei nanare, rava i kwatuei da awarina i ġei. <sup>14</sup> Tauna, nelara 12 i vinei da maiteni ita mae ma muriae ita paritawanei da ita raugugula. Ma i ġorei *Apasol*. <sup>15</sup> Ma i vovai-virewapani da arua-apoapoei rava au orai ina viopuni.

<sup>16</sup> Taui i vinevinei 12 ai wava wenanare,  
Simon i ġoreġoreia Peter†

<sup>17</sup> ma Zebedi§ natuna James ma ana tevera John i ġorei Boaneges, anona waiparara natu-natuna,

<sup>18</sup> Andrew,

Philip,

Batolomeo,\*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

<sup>19</sup> ma Judas Iskariotei; \* tauna, Iesu tauviben-abenameina.

*Rava i riwa da arua-apoapoei Iesu e vivibadei.  
(Matthew 12:22-32; Luke 11:14-23; 12:10)*

---

† **3:16:** Anona Ġaima.    § **3:17:** Eng. Zebedi.    \* **3:18:** Eng. Batolomeo.    † **3:18:** Eng. Alphaeus.    † **3:18:** Wavana ġelauna Judas - Luk 6:16    § **3:18:** Anona lamna taui mai Jew ma taui Rome e viviġavie.    \* **3:19:** Iskariot, lamna Judas ana melagai wavana da auna lamna Iskariotei.

**20** Ma Iesu ana tauvotaḡotaḡo maiteni i rui au numa. Ma patara i rieiai da taui eḡa tagotagogina da ita am. **21** Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

**22** Tarawatu babadai ġelaui Jerusalemei i nei ma i riwa i pa, “Arua-apoapoei, ai bada Bielsibul,<sup>†</sup> Iesu au orana i rui ma lamnei arua-apoapoei e viviopuni.”

**23** Lamna aubaina Iesu, wei Babadai i ġorei ma awanainei i pa, “Satan amapo Satan eḡa ina viopuni. **24** Mepa da dobu ravai ina viḡavia vivira, lamna dobuna ita mae ava. **25** Ma nanare dam ina viḡavia vivira, nai damna ita mae ava.

**26** Ma Satan ita vomairi ma ita viḡaviana-melei, amapo ita mae ava. **27** Taudanene amapo eḡa rava virewapanana ana au numa ina danene, eḡa da au naona ravana ġuravei ina raġini ma muriae ina danene. **28** Riwa kaua a ririwemi da God ami ġo’apoapoei ma ami vijiboḡa anatapui ina nota-tawanei. **29** Wate aiai da Arua Vivivireina e viviġiboj, God, nai ravana ana ġo’apoapoei eḡa melanai ina nota-tawanei ma ana ġo’apoapoe ina mae-nonoa.” **30** Iesu wenanare i babani, aubaina rava ġelaui e ririwa, “Iesu au orana arua-apoapoei e mamae.”<sup>‡</sup>

*Iesu ana dam oina  
(Matthew 12:46-50; Luke 8:19-21)*

<sup>†</sup> **3:22:** Eng. Beelzebub. Anona lamna, nabugara ai bada.

<sup>‡</sup> **3:30:** Tarawatu tau girumi i parivaijijigei aubaina taui e ririwa da Arua Vivivireina ana nola lamna baravu da parauma. BADA eḡa melanai ai ġo’apoapoei ina nota-tawanei.

<sup>31</sup> Iesu alona ma varevareina i nei ma au doa i maimairi ma riwa i paritawanei Iesu awarina da ita nei. <sup>32</sup> Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e ġoeġgoem.”

<sup>33</sup> Iesu i paribelei i pa, “Aiai alou ma aiavoi varevareiu?” <sup>34</sup> Anina ma taui i kiakiala i ’nanai ma i riwa i pa, “Ona inana! Wei taui alou ma varevareiu. <sup>35</sup> Aiai God ana ġoana e kaukauei, tauna alou ma novu ma vareiu.”

## 4

### *Doa tapuna ma tapuna ai awanaina (Matthew 13:1-9; Luke 8:4-8)*

<sup>1</sup> Iesu, giu i raukarena-melei Galili topana au adana. Ma patara i riei da ita rautaniġanei. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

<sup>2</sup> Ma kaua maġamaġau awanainei i giu ma i viararamana i pa, <sup>3</sup> “Ona rautaniġana! Taupaewa, ana wapu i vokaukauei ma pei i ravi awawari. <sup>4</sup> Pei ġelaui au eta i peu. Ma kiu i ġeta ma i ani. <sup>5</sup> Ma pei ġelaui doa au ġaiġaimana i peu, doa au avavana. Ma lamna aubaina maratagogi i gogo. <sup>6</sup> Wate maranai madeġa i rarani, maratagogi i poi, anona warami eġa ita ġaira guratana doa au orana. <sup>7</sup> Pei ġelaui, modu donadonai au poui i peu. Ma modu donadonai i gogo ma pei i gogogo i lavani, ma eġa ita ua. <sup>8</sup> Ma pei ġelaui doa au aiaina i peu ma i gogo kaua ma i ua, ġelaui 30, ġelaui 60 ma ġelaui 100.”

<sup>9</sup> Ma Iesu i riwa i pa, “Mepa da taniġami e mamae, riwa ona nonori!”

*Aiwei aubaina Iesu awanainei i babani  
(Matthew 13:10-17; Luke 8:9-10)*

**10** Maranai Iesu ainelana i mamae ma ana tau-votaōtaō 12 ma taurautaniōgana īelaui i īeta ma Iesu i vibaōai da awanaina anona ita riwei.

**11** Ma Iesu i paribelei i pa, “God ana vigulau ana kaua mamae govaōgana; taumi i vieōemi ma rava au tano maemaei, taui aiwai anatapui awanainei e paripari-verei. **12** Lamna ana kauei da wariaōga peroveta aiwai i girugirumia ina tupua:

‘Taui ina inana ma eōga ita inainanai.

Taui e rarautaniōgana ma eōga ita araramanei; ma lamna aubaina taui eōga ita nenei God awarina

da ai īgo’apoapoe ita notatawanei.” *(Isaiah 6:9-10)*

*Doa tapuna ma tapuna anoi.*

*(Matthew 13:18-23; Luke 8:11-15)*

**13** Anina ma Iesu i riwei i pa, “Wei awanainei a babani ma anona eōga ota aramanei bo? Ma awanaina īelaui menanare ona aramananei?

**14** Taupaea, God riwana, rava anatapui e paripari-verei. **15** Rava īelaui orai i bagibagi me etanai. Riwa au tepana e raurauei, wate maratagogi Satan e nenei da riwa rava au orai e vaivai-tawanei. **16** Ma rava īelaui orai me doa viīgaimana. Taui, riwa i nonori ma maratagogi ana nuaiāi riwa e vaivaia. **17** Wate warami eōga da eōga ita mamae guratana. Ma maranai nuabola bo rau-iviapoapoe e nenei taui awari, aubaina taui ai tumaōgana God awarina e tereterei. Taui maratagogi e peupeu. **18** Rava īelaui orai me pei, modu donadonai au orai e gogogolana. Taui anina

riwa e nononori. <sup>19</sup> Wate lawana ai nuabola ma mane ai nuavainana ma kaua ġelaui ai au nuaiai e ruirui ma God riwana e lavalavani da eġa ita uua. <sup>20</sup> Ma ġelaui, taui me pei doa au aiaina i peu. Taui, lamna anina riwa e nononori ma e vaivai-kauei ma e uua: ġelaui 30 ma ġelaui 60 ma ġelaui 100.”

<sup>21</sup> Iesu i riwei i pa, “Rava, eġa rampa ita neineiai da iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa? <sup>22</sup> Kaua mamae govaġai, anataputapui a vieġai ma kaua govagovaġai nanarena ana vieġai. <sup>23</sup> Mepa da taniġami e mamae, riwa ona nonori!”

<sup>24</sup> Iesu i riwa i pa, “Aiwai o nononoria ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi. <sup>25</sup> Lamna aubaina, mepa da riwau ona aramanei, tau ġelauna ma ġelauna ana veremi. Ma taui eġa ita aramanei, lamna aiwai aburuna i nononoria, ina vine-boai.”

### *Pei gogogona ana awanaina.*

<sup>26</sup> Iesu e ririwa i pa, “God ana vigulau me rava, *witi* peina au doa ita ravi-awawari. <sup>27</sup> Ma waguvvara e matamatave ma maratom e vovomairi ma pei e gogogo ma e rarata. Wate aiwaiei e gogogo, tauna e vivinuanainei. <sup>28</sup> Doa ana nuaina, pei me *witi* e vivigogoi ma e uua. Au naona e raraupairei ma muriae e roverove ma muriae anona e magumagura au tapina. <sup>29</sup> Maranai i magura, rava petona e raraukarei. Tuaruta marana i ġetai.”

### *Pei aburuoina ana awanaina (Matthew 13:31-32, 34; Luke 13:18-19)*

<sup>30</sup> Iesu i riwa i pa, “God ana vigulau aiwaei ana parivai-patepatei bo aiwai awanainei ana pariveremi? <sup>31</sup> Wenanare, wei aina peina, lamna me gaga peina, pei aburuoina au dobu ma au doa i paewi. <sup>32</sup> Ma peina i gogo ma i rata da ai muomuoi i ġetawanei ma raġaraġai ġaegħae i terei ma au ġoui, kiu ai noġi ita voai.”

<sup>33</sup> Ma Iesu, awanaina maġamaġaui, rava au matai i raugugulei da taui ai rau-taniġana ana au ruva nanare. <sup>34</sup> Awanainei, rava awari i giugiu, wate ana tauvotaġotaġo ava awari kaua anatapui i vivieġġai.

*Iesu, kojikojira i ravi-daumorai  
(Matthew 8:23-27; Luke 8:22-25)*

<sup>35</sup> Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.” <sup>36</sup> Anina ma taui patara i voterei. Ma anatapui Iesu, maiteni au waga i geru ma i damana, waga ġelaui maiteni. <sup>37-38</sup> Iesu, waga au murina unutana i terei ma i raunuavuru. Ma kojikojira ġaegħaena i tupua ma rabama, waga au tepana i rauraei ma waira, waga i oaoai. Ma ana tauvotaġotaġo, tauna i ravi-dagudagui ma i riwei i pa, “Taugiu, nuanuam e bolabolai bo eġa da tana iraġe?”

<sup>39</sup> Ma tauna i vomairi ma ive i viġġaei ma i riwei i pa, “Ma genuana!” Ma rabama i riwei i pa, “Ma mae-genuatau!” Ma ive i wanatuini ma daumora ġaegħaena i matave. <sup>40</sup> Iesu ana tauvotaġotaġo i riwei i pa, “Ai-wai aubaina o rovorovo? Taumi amapo da eġa ota vitumaġħana!”

**41** Ma taui i rovo kaua ma i riwa vivira i pa,  
“Wei aiai ravana da ive ma rabama tauna  
e vovoteletelei?”

## 5

*Iesu, arua-apoapoena oroto awarina  
i viagāgana-opunei.*

(Matthew 8:28-34; Luke 8:26-39)

**1** Iesu ana tauvotaḡotaḡo maiteni Galili topana au baba ġelauna i ġeta, mai Geresa ai au dobu. **2** Wei au dobuna, arua-apoapoena oroto au orana maemaena. **3-5** Eġa aiai tagotagogina da ita vovaiubai. Mara maġamaġauna, aena ma urana seinei i pani. Wate wei i viaituituini, ma eġa tagotagogina da seinei ita pani. Marai ma waguvvarai i nene-labalababa ma i garagarara ma ġaimei tupuana i boribori-melei ma au kokoaga ma au ola i raunuma. **6** Maranai Iesu wagei i opuopu, arua-apoapoei orotona i ruiruinia, aueia Iesu i 'nanai ma kokoagei i ruba ma Iesu au naona i mae-peu ma i raudune. **7-8** Iesu, ravana i riwei i pa, “Arua-apoapoena, wei orotona ma oputawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ġoegħoei? God wavanei a vivibaġaim da eġa ma kovoġiu!” **9** Iesu, orotona i vitara-virevirei i pa, “Tam wavam aiai?”

I paribelei i pa, “Tauai a maġa, aubaina tau wavau lamna Ġavia Patarana.”

**10** Ma arua-apoapoei, Iesu i vibagħa-guratei da avena nai dobunei ita viopuna-tawanei.

**11** Ma poro boruna ġaeġaena au ġereġere ola au adana i labalaba. **12** Ma arua-apoapoei, Iesu

i vibaḡai, “Ma paritawanelai poro au orai ana rui.”  
**13** Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ġaira da au topa i monu.

**14** Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua. **15** Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma taui i rovo kaua. **16** Ma aiwai i tupua orotona ma poro awari, taui i ’nainanaia, rava i riwana-naiei.

**17** Ma dobuna ravai, Iesu i vibaḡai da dobuna ita oputawaneii.

**18** Iesu au waga i gerugeru ma orotona, Iesu i vibaḡai i pa, “Tau maiteni tana nae.”

**19** Iesu i viḡaei ma i riwei i pa, “Ma naeme am au dam. Ma BADA kaua aiwai ġaegħaena i kaukaueia ma ana iviaiai tam awarim, taui ma pariverei.”

**20** Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma taui anatapui i nononoria i baiei.

*Iesu, Jairus natuna wavinena ma wavine doridoriani i vilawani.*

(Matthew 9:18-26; Luke 8:40-56)

**21** Iesu wagei i damana me topa au baba ġelauna. Maranai kampa i ġeta ma topa au adana, ma patara i rieiai. **22** Pari numana badana wavana Jairus i nei weka ma maranai Iesu i ’nanai, tauna Iesu au aena i mae-peu **23** ma i vibaḡa-guratei i pa,

“Natu guguinina e irairaġe. Ma nei ma uram au inina ma terei ma ina lawana.”

<sup>24</sup> Anina ma Jairus, Iesu maiteni i nae ma patarana i mae gariġuruvi ma i votaġoġtaġoi.

<sup>25</sup> Wavine tagogi kampa patarana au orana awarina tara-doriani i mae da madega 12 i kwa. <sup>26</sup> Ana mane anataputapuna, dokedoketa maġamaġau awarii i tawanei ma eġa tagotagogina ita vilawani ma amapo da ana doria i rarata. <sup>27-28</sup> Tauna, Iesu nolana ma ana babani i nonori ma au orana i vinuanotanota i pa, “Mepa da ana gara ava ana vodadani ma ana lawana.” Ma tauna, Iesu murinei i nei ma ana gara i vodadani. <sup>29</sup> Maratagogi, tara-doriani i wanatuini ma malana i vaia da i lawana. <sup>30</sup> Nai maranaina, Iesu malana i vaia da ana rewapani i opu-tawanei ma i mae-tavirei patara au poui ma i riwa i pa, “Aiai au gara i vodadani?”

<sup>31</sup> Ana tauvotaġoġo, tauna i riwei, “Ma inanai, patara i mae gariġuruvim! Ma menanare da u riwa ‘Aiai i vodadani?’”

<sup>32</sup> Wate Iesu i ’nanq viravira da ita inanai aiai i vodadani. <sup>33</sup> Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieġei. <sup>34</sup> Anina ma Iesu, wavine i riwei i pa, “Natu, am tu-maġana i vilawanim. Am doria i kwa, ana nuaubam ma nae!”

<sup>35</sup> Maranai i bababani ma rava ġelaui Jairus ana numei i nei ma i riwei i pa, “Natum ana mara i kwa. Eġa Taugiu ma visina-viravirai.”

<sup>36</sup> Iesu ai bababani i nonora-tawanei ma Jairus i riwei i pa, “Eġa ma rovo, ma vitumaġana!” <sup>37</sup> Iesu, rava ġelaui i viġaei ma Peter ma James ma ana tevera

John maiteni i nae. <sup>38</sup> Ma Jairus ana au numa i ġeta ma Iesu, patara i 'nanai; i toutou ma i taratarakwatu <sup>39</sup> ma i rui ma taui i riwei i pa, "Aiwai aubaina o taratara-kwatu ma o toutou? Tevera eġa ita iraġe, tauna e matamatave ota."

<sup>40</sup> Ma taui, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġotaġo tonuġa maiteni i rui mepa tevera i matamatave lana. <sup>41</sup> Iesu, tevera nimana i vaia ma i riwei i pa, "*Talitha koum!*" wei anona, "Kukuma, ma vomairi!"

<sup>42</sup> Maratagogi i vomairi ma babara i vikarei (Tauna ana madeġa 12). Ma taui i ba kaua. <sup>43</sup> Iesu, taui i riwana-guratei da eġa aiai ita vieġei ma i riwa da ita viambagibagi.

## 6

### *Mai Nasaret, Iesu i parivirevirei*

<sup>1</sup> Iesu ana tauvotaġotaġo maiteni nai dobuna i netawanei ma i naeme ana au melagai. <sup>2</sup> Ma Sabat marana i ġeta ma tauna giu i vikarei au pari numana. Ma rava maġamaġgħaui i riei da i rautaniġanei. Taui anatapui i baiei ma i vitara-viravira vivira i pa, "Wei tauna nuaulaula ma aramanana mepa i vaia?" Ma, "Kaua aiwaiei e kaukauei?" <sup>3</sup> Anina ma taui ava i babani vivira i pa, "Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?" Ma lamna aubaina mai Nasaret, Iesu i parivirevirei.

**4** Iesu, taui i riwei i pa, “*Peroveta* dobu au ġelaui e vivivirei, wate ana au melagai, ana rava ma ana dam oina, eġa ita vivivirei.”

**5-6** Tauna i baiei da rava eġa tauna ita vitumaġanei. Ma eġa tagotagogina da kaua vivirewapanai kampa ita kaei. Tauna urana, rava ruāga ota doridoriai au tepai i terei ma i vilawani. Ma muriai, melagai nununai au ġereġerei i viararamana nae.

### *Iesu ana Apasoli paritawanei da ita viararamana*

**7** Ma Iesu, taui 12 i ġoreiai ma ruaruāgei ava i paritawanana-opunei ma rewapani verei da arua-apoapoei ina viaġaġana-opunei. **8** Ma riwa bagibaginei i riwei i pa, “Ami au vaġai, eġa aiwai ona vaia anina jiġona ava; eġa lam, eġa autu bo mane au urami. **9** Ae uma ona oteni ma eġa kwama ġelauna ona vaia.” **10** Ma i riwei i pa, “Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei. **11** <sup>◊</sup>Mepa da au melagai o ġeta ma rava eġa ita vianinemi bo eġa ita rautaniġanemi. Nai melagaina ona oputawanei ma aemi pokauna ona rauabuabui da ina aramanei da taui ai wavu!”\*

**12** Ma taui i opu ma rava awari i raugugula ma i riwei i pa, “Taumi ami ġo’apoapoei ona voterei ma

---

<sup>◊</sup> **6:11:** Act 13:51      \* **6:11:** Wariaġa mai Jew, tauvaġai e nenememei au Israel. Taui au aei pokau e raraubuabui maranai Israel ana au parata e ġeġeta, lamna taui orai e viaiaini. Ma Iesu ana tauvotaġotaġo wei i kaei da melagai ravai ina notai, “Tauvotaġotaġo e ririwa da tauta orata apoapoeni me tauta eġa mai Jew.”

ona mae-taviremi God awarina!” <sup>13</sup> Taui, arua-apoapoei i viağagana-opunei. Ma rava doridorriai mağamağau, olive oirana au kolai i buloi ma i vilawani.

### *John Taubabataito ana irağe*

<sup>14-16</sup> <sup>◊</sup>Iesu nolana i nae da rava anatapui i aramanei ma tauna i babaniei. Ma rava ġelaui i ririwa i pa, “Tauna, kaua vivirewapanai e kaukauei, aubaina tauna John Taubabataito irağelei i vomairi me.” Ģelaui i ririwa i pa, “Tauna Elijah i nememei.” Ma ġelaui i ririwa i pa, “Tauna peroveta wariağai nanare.” Ma gulau Herod,<sup>†</sup> nolana i nonori ma i riwa i pa, “Tau, John Taubabataito uana a borituini; marina i vomairi me.” <sup>17-20</sup> John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravağı. Wavinena wavana Herodias. Au murina John, Herod i riwana ġirigiriei i pa, “Tarawatu e mamae da eğä vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniğanei. Wate nuanuana i rağarağā.

Ma Herodias, John awarina amlona i ġaiğai ma virağenana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eğä tagotagogina da aiwai ita kauei.

---

<sup>◊</sup> **6:14-16:** Mrk 8:28      <sup>†</sup> **6:14-16:** Herod Antipas, Galili ana Wavalatona.

<sup>21</sup> Ma wavine, gavogavo i'nanai, maranai Herod ana tupua marana i'geta ma torela i vokaukauei. Ma gabemani babadai ̄gaegaei ma sorodia ai babada ̄gaegaei ma Galili babadai i raukwatuei. <sup>22</sup> Ma Herodias natuna wavinena i nei ma i ara. Herod ma taui maiteni i amam i vinuiaiaini. Ma gulau, guguini i riwei i pa, "Aiwai u ̄goēgoeia ma vibāgaiu ma ana verem!" <sup>23</sup> Ma i parivainuāgani i pa, "God au matana a ririwem da aiwai u vivibāgeiu ana verem da au vigulau navanavana au paratana."

<sup>24</sup> Ma tevera wavinena i opu ma alona i paridadanei i pa, "Aiwai ana vibāgei?"

Ma i paribelei i pa, "John Taubabataito kolana."

<sup>25</sup> Ma maratagogi i vipaparana ma gulau awarina i rui ma i vibāgai i pa, "A ̄goēgoei da marina John Taubabataito kolana ma vereu au aboma!" <sup>26</sup> Ma gulau nuanuana i bola-kauei. Wate parivainuāgana boibogi i kauei taui i amam au matai. Ma lamna aubaina guguini, aiwai i vivibāgei anina i vianinei. <sup>27</sup> Ma tauvirāgena i paritawanei ma i riwei da John kolana ita neiai. Ma i nae panipani au numana ma John uana i borituini. <sup>28</sup> Ma kolana au aboma i terei ma guguini i verei ma guguini, alona i verei. <sup>29</sup> Ma John ana tauvotāgotāgo, nolana i nonori ma i nei ma taubeuna i vaia ma au kokoaga i vimataveni.

*Iesu, nelara 5,000 i viambagibagi*

*(Matthew 14:13-21; Luke 9:10-17; John 6:1-14)*

<sup>30</sup> Apasol i'geta memei ma aiwai anataputapuna i kaukauei ma i raraugugulei, Iesu i viēgei. <sup>31</sup> Lamna maranai, rava māgamagāgau i nenei ma i nena da Iesu ana tauvotāgotāgo maiteni ēga gavogavo

ita maemae da ita am. Lamna aubaina Iesu, taui i riwei i pa, “Taumi ava ona nei ma tana nae au mutulua da laumi ina tau mara aburuna.” <sup>32</sup> Ma anatapui wagei i nae au mutulua.

<sup>33</sup> Wate rava maḡamaḡaui i ’nanai i nenea ma i aramanei taui aiavoi. Ma melagai nununai anatapui geraei i ruba gogona da au dobuna i aīgeta. <sup>34</sup> Maranai Iesu wagei i tuopu au gera ma patara ġaeġaena i ’nanai ma nuanuana i bola-kauei. Taui me sipu ma eġa ai tauvipaipai. Ma Riwana Aiaina viararamanai i raukarei. <sup>35</sup> Ma au biga e tuturiae ma ana tauvotaġotaġo i nei awarina ma i riwei i pa, “Wei mutulua ma madeġa e arearere. <sup>36</sup> Rava ma paritawanei da ina nae au melagai ma au wapu au ġereġere da ai lam ina gimarai.”

<sup>37</sup> Wate Iesu i paribelei i pa, “Taumi ona viambagibagi!” Ma taui i paribelei i pa, “Mepa 200 *denarii*† tana vaia da wei patarana tana viambagibagi?” <sup>38</sup> Ma Iesu i paridadanei i pa, “Palawa biaġa awarimi? Ona nae ma ona baiei!”

Maranai i nelaġai ma i riwa i pa, “Awariai, palawa five ma iana ruāġa.”

<sup>39</sup> Anina ma Iesu, patara i riwei i pa, “Boru nununai, gidagida au majimajiġai ona kiala nae.” <sup>40</sup> Ma taui ai au boru 50 da 100 nanare i kiala nae. <sup>41</sup> Ma Iesu, palawa five ma iana ruāġa i vaia ma i ġoutata au mara ma God i viegualaei. Ma palawa i vogimagimai ma iana i ġutai da ana tauvotaġotaġo i verei ma taui, rava i verei. <sup>42</sup> Ma patara i am ma

---

† **6:37:** 200 denarii. Denarius tagogi lamna taubagibagi ai maia au pom tagogo nolana aubaina.

i am-iaua. <sup>43</sup> Ma ana tauvotaḡotaḡo, lam am tereterenai i tuarui da poa muomuoi 12 i vioai. <sup>44</sup> Nelara 5,000 i viambagibagi.

*Iesu, waira au tepana i babara  
(Matthew 14:22-33; John 6:15-21)*

<sup>45</sup> Anina ma Iesu, ana tauvotaḡotaḡo i egari da ita aidamana au Bethsaida.<sup>§</sup> Taui au waga i geru da i nenaе ma tauna, patara i paritawanei. <sup>46</sup> Patara i paritawanei ma tauna ava i ġae au ola da ita raupari. <sup>47</sup> Ma waguvvara ana tauvotaḡotaḡo au waga au topa ma Iesu au alala. <sup>48</sup> Ma ana tauvotaḡotaḡo, lare i vovoguratei da ita ġota wate ive i viraumatamatani. Ma maratomtom nanare, Iesu i nae awari. Tauna waira au tepana i bababara ma i ġoei da taui ita tutelarei. <sup>49-50</sup> Ma maranai taui, Iesu i 'nanai topa au tepana i bababara ma i notai da tauna konāga ma i rovo kaukaua ma i vigaragararei. Ma maratagogi Iesu i riwa i pa, "Tepami ina tora! Tau, eġa ona rovo!"

<sup>51</sup> Ma au waga i geru ma ive i wanatuini ma taui i bana-kauei. <sup>52</sup> Avena da kaua palawa awarina i kauei i 'nanai, wate ana rewapana eġa ita aramana-kauei. Taui orai i bado ma i vinuanaina.

*Iesu, rava doridoriai maġamaġau i Genesaret  
i vilawani*

*(Matthew 14:34-36)*

<sup>53</sup> Taui, topa i damani ma au Genesaret i ġota ma ai waga i raġini. <sup>54</sup> Taui, waga i opūtawanei ma rava, Iesu i 'nanai ma maratagogi i aramanei da tauna. <sup>55</sup> Iesu nolana, Galili provins anatapui i naeni ma

---

§ **6:45:** Eng. Bethsaida.

i nonori da tauna mepa i mamae. Ma kampa, doridoriai rasirasiei i vivaneiai. <sup>56</sup> Iesu mepa i nenelana, melagai ġaeġaei ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaġa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

## 7

*Amamami ai giu  
(Matthew 15:1-9)*

<sup>1-4</sup> Pharisi ma Jew anatapui, magumagura ai giu maġamaġaui e notanota-jijini. Taui, ai anima ma ai aniam anatapui e oġaoġai lamnei taui e viaiaina-melei God au matana. Ma maranai au maket da e nenei, urai ina oġai ma ina am. Taui eġa ina am da au naona urai ina oġa kaei me ai magumagura ai giu nanare.

Maratagogi Pharisi ġelaui ma Tarawatu Babadai, Jerusalem ei i nei Iesu awarina da ita rautaniġanei. Ma taui i 'nanai da Iesu ana tauvotaġotago ġelaui, urai eġa ita oġai ma i amam.

<sup>5</sup> Ma taui, Iesu i vitara-virevirei i pa, “Aiwai aubaina am Tauvotaġotago magumagura ai giu, eġa ita votaġotagoi ma ana ura miramirai e amam?”

<sup>6</sup> Ma Iesu i paribelei i pa, “Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

‘Wei ravai ipiriei e vovoepaepaiu,  
wate nuuanuai ueia.

<sup>7</sup> Taui rava ai giu e viviararamani.

Lamna aubaina ai voepaepa anona eġa.’  
(*Isaiah 29:13*)

**8** Taumi, God ana Tarawatu o teretere-tawanei ma ami giu o votaḡotaḡoi.”

**9** Ma i riwana-melei i pa, “Taumi o aramana kaua da God ana Tarawatu o gedugeduaiei ma amamami ai giu o vovotaḡotaḡoi. **10** <sup>✧</sup>God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viraḡeni.* **11** Wate taumi o viararamana da aiai awarina mane bo purapura, amana bo alona ita voagui ma ita riwei, ‘Awariu e mamae da ata voaguim; wate lamna *Corban* - a tereriei pulo, God aubaina.’ **12** Wei viararamanana, taui e vivīgæi da amana ma alona ina voagui. **13** Ma wei taunei viararamana, rava awari o vividamani; ma God riwana o vivikwakwavi. Ma kaua maḡamaḡaui ḡelauui maiteni o kaukauei.”

*Metauna kauai, rava orai e vivimirai.  
(Matthew 15:10-20)*

**14** Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei. **15-16** Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”\*

**17** Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai. **18-19** Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au

---

<sup>✧</sup> **7:10:** Exo 20:12; Exo 21:17      \* **7:15-16:** Giruma ḡelauui Mark uranei i girugirumia wei riwai wenanare e mamae, “Mepa da taniḡami e mamae, ona rautaniḡana.”

nuapouna, wate au manawana da e opuopu.” (Wei riwanei Iesu, lam anatapui i viaiaini).

<sup>20</sup> Anina ma i riwa i pa, “Aiwai, rava oranei e opuopu; lamna, rava e vivimirai God au matana. <sup>21</sup> Anina rava nuanuanei vinuanotanota apoapoei e opuopu me: viawawana labalababa, danene, viraġena, awadanene, <sup>22</sup> ambo, rau-iviapoapoe, moru, erawa, unura, terevaideġa, mae-ġaeġae ma opa. <sup>23</sup> Wei kauai apoapoei anatapui oranei e opuopu ma rava e vimiramirai.”

*Jentail wavine,<sup>†</sup> Iesu i vitumaġanei  
(Matthew 15:21-28)*

<sup>24</sup> Ma dobuna i voterei ma i nae Taia ana au parata. Ma i rui govaġa au numa ma eġa ita ġoei da rava ita aramanei da tauna kampa, wate eġa tagotagogina da ita raugovaġa. <sup>25-26</sup> Wavine tagogi, Iesu nolana i nonori ma i nei awarina. Tauna eġa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibagħi da arua-apoapoena ita viopuni. <sup>27</sup> Iesu i aramanei da tauna Jentail; lamna aubaina i riwei i pa, “Eġa ita ai da roaroa ai lam ata vaia da auou ata verei da au naona roaroa ina am-iaua.”<sup>‡</sup>

<sup>28</sup> Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoġina, kepakepa au gabaurina e rauraua e aniani.”

---

<sup>†</sup> **7:23:** Rava eġa mai Jew.      <sup>‡</sup> **7:27:** Riwa roaroa wei au awanaina lamna mai Jew. Taui e notanotai da taui i ai guratana eġa me rava ġelaui. Lamna aubaina taui dobu ġelaui ravai e ġoreġorei auou.

<sup>29</sup> Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

<sup>30</sup> Ma wavine i naeme au numa. Natuna wavinena i 'nanai i matamatave, arua-apoapoena boibogi tevera i opu-tawanei.

*Iesu, oroto taniā-potapotana ma mena birebirena i vilawani*

<sup>31</sup> Iesu Taia ma Sidon ana parata i netawanei ma au babağela Dekapolis i verautuini ma i nae au Galili topana. <sup>32</sup> Orotō taniā-potapotana ma menana birebirena i neiai Iesu awarina ma i vibağai da urana au inina ita terei da ita vilawani. <sup>33</sup> Iesu, oroto i taravaina-opunei da taui ava ma ura-gigina, oroto au taniā-potapotana i terei ma ura-gigina ġelauna i ovai ma menana i vodadani. <sup>34</sup> Nuanuana i bolai ma i ġoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!” <sup>35</sup> Maratagogi taniā-potapotana i wanatawanei ma menana i vidagudagu ma i babani kaua. <sup>36</sup> Ma Iesu, taui i viğaei da aiwai i tuputupua, avena rava ita vieğei. Iesu, rava i viğaei; wate taui eġa ita rautaniā-potapotana ma riwa i vituai. <sup>37</sup> Ma maranai ravai wei i nonori, taui i bana-kauei ma i riwa i pa, “Aiwai anatapui i kauana-kauei. Tauna, rava taniā-potapotana e vivilawani da e rarautaniā-potapotana ma menabirebirei e bababani.”

## 8

*Iesu, rava 4,000 i viambagibagi  
(Matthew 15:32-39)*

<sup>1</sup> Nai maranai, patara ġaegħaena i riana-melei. Patara eġa ai lam. Ma Iesu, ana tauvotaġo

i kwatuei da i nei ma i riwei i pa, <sup>2</sup> “Au pom tonuāga patara maiteni a mae ma ai lam eāga ma a rau-nuapoapoelei. <sup>3</sup> Taui ġelaui, uamei i nei. Mepa da ana am-irāge ana paritawanei ai au numa, ma au etanai ina raumolaġau.”

<sup>4</sup> Ma ana tauvotaġotaġo i paribelei i pa, “Wei mutulua ma mepa lam tana vaia da wei patarana tana viambagibagi?”

<sup>5</sup> Ma Iesu, taui i paridadanei i pa, “Awarimi palawa biaġa?”

Taui i riwa i pa, “seven.”

<sup>6</sup> Ma Iesu, patara i riwei da au doa i kiala. Ma palawa seven i vaia ma God i viegualauei ma i vogimagimai ma ana tauvotaġotaġo i verei da patara i verei. <sup>7</sup> Ma taui awari, iana muomuoi ruaġa ota. Iesu i vaia; God i viegualauei ma ana tauvotaġotaġo i verei da patara i verei. <sup>8</sup> Taui anatapui i am da i am-iaua. Ma lam am terererenai i tuarui da poa ġaeġaei seven i vioai. <sup>9</sup> Rava 4,000 i viambagibagi. Ma muriai i paritawanei ai au numa.

### *Pharisi, God ana mataira i vibagħi*

(Matthew 15:39–16:4)

<sup>10</sup> Maratagogi, Iesu ana tauvotaġotaġo maiteni au waga i geru ma i nae Damanuta ana au parata.

<sup>11</sup> Pharisi ġelaui i nei ma viparipariġai i vikarei Iesu maiteni. Taui i ġoiei da Iesu ita raudadani da mataira Godei ita viatataiei. <sup>12</sup> Iesu, Aruanei i lavutu tawanana ma i riwa i pa, “Wei kimta voui, ai-wai aubaina mataira e ġoegħoei? A ririwana-kauemi, amapo mataira eāga ona inanai.”

### *Iesu, ana tauvotaġotaġo I parivainotai*

**13** Anina ma Iesu, patara i netawanei ma ana tau-votaḡotaḡo maiteni au waga i geru me ma i damana Topa Galili au baba ġelauna. **14** Ma ana tau-votaḡotaḡo, nuanuai i vuru da ai palawa ita vaia ma palawa tagogi ava au waga i mamae. **15** Iesu, taui I parivainotai i pa, “Pharisi ma Herod ai giu ma ai viararamana morumoruna ona inana-kauei! Lamna me yist.”\*

**16** Ma taui i babani vivira i pa, “Tauta eḡa ata palawa aubaina da e ririweta.”

**17** Ma Iesu i aramanei ma taui i riwei, “Aiwai aubaina o bababani da taumi awarimi eḡa palawa? Taumi amapo da eḡa ota aramana ma o vivinuanaina? Orami i bado bo? **18** Matami e mamae ma eḡa ota inainana. Ma taniḡami e mamae ma eḡa ota nonora. Ma o vinuanotanota bo eḡa? **19** Maranai palawa five a vogimagimai rava 5,000 aubaii, lam am tereterenai o tami da poa biaḡa o vioai?”

Taui i paribelei, “Twelve.”

**20** “Ma maranai palawa seven a vogimagimai rava 4,000 aubaii, lam am tereterenai o tami da poa ġaeḡaei biaḡa o vioai?”

Taui i paribelei, “Seven.” **21** Ma taui i riwei i pa, “Ma amapo da o vivinuanaina!”

*Iesu, oroto mata apoapoena i vilawani au Beth-saida*

**22** Taui i nei au Bethsaida ma rava ġelaui, oroto matana apoapoena i neiai Iesu awarina ma

\* **8:15:** Yist mai Jew awarii awanainei lamna aiwai da apoapoe, mira bova e vivitua bo e vivimägai. Weka Iesu mai Pharisee ma mai Herod ai lawana ma ai giu morumorui e babaniei, da eḡa ina tua.

◊ **8:18:** Mrk 4:12

i vibaḡa-guratei da ita vodadani. <sup>23</sup> Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eḡa?”

<sup>24</sup> Ma i taepai ma i riwa, “Rava a inainanai ma taui me ai ita bababara.”

<sup>25</sup> Iesu, urana i tere-melei oroto au matana. Ma matana i wanatawanei da aiwai anatapuna i ’nankauei. <sup>26</sup> Iesu, tauna i paritawanei ana au numa ma i riwei, “Eḡa ma nae au melagai! Wate jijimanina ma nae au numa.”

*Peter i riwa da Iesu, tauna Keriso  
(Matthew 16:13-16; Luke 9:18-20)*

<sup>27</sup> Iesu, ana tauvotaḡotaḡo maiteni i nae melagaii Caesarea Philipai au ḡereḡerei. Maranai i nenaе ma Iesu, taui i paridadanei, “Rava e ririwa; tau aiai?”

<sup>28</sup> <sup>✳</sup>Ma taui i paribelei, “Āelaui e ririwa da tam, John Taubabataito. Ma āelaui Elijah. Ma āelaui e ririwa da peroveta wariaḡana tagogi.”

<sup>29</sup> Ma Iesu, taui i paridadanei, “Wate taumi, mena o notanota-nei? O ririwa da tau aiai?”

*Peter i paribelei, “Tam God ana Messiah - anona Keriso.”*

<sup>30</sup> Iesu, taui i viḡaei da eḡa aiai ina riwei da tauna aiai.

*Iesu ana iraḡe ma ana vomairi me i babaniei  
(Matthew 16:21-23; Luke 9:21)*

<sup>31</sup> Ma Iesu i raukarei da ana tauvotaḡotaḡo i giuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduaiei ma ina viraḡeni. Ma au pom

---

<sup>✳</sup> **8:28:** Mrk 6:14-15

tonuāga au murina ina vomairi me.” <sup>32</sup> Iesu jiji-maninei wei kauai i bababaniei ma lamna aubaina Peter, tauna i taravaini au ririva ma enana i vikarei. <sup>33</sup> Wate Iesu i mae-tavirei ma ana tauvotaōtaōgo i 'nanai. Ma Peter i eni, i pa, “Satan ma nae au muriu! Tam am nota eōa Godei ita nenei, eōa da ravei.”

*Iesu votaōtaōgoa anona  
(Matthew 16:24-28; Luke 9:23-27)*

<sup>34</sup> Ma Iesu, patara ma ana tauvotaōtaōgo i raukwatuei ma i riwei, “Mepa da aiai ita votaōtaōgoi. Tauna ina boviana-melei ma ana korosi ina avarai ma ina votaōtaōgoi. <sup>35</sup> Aiai ana lawana e tatajijini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimalei. <sup>36</sup> Ana aii bo anona aiwai, mepa da wei dobuna lawanana ma vigulauna ma vaipai ma am lawana maemae-nonoana ma vine-boai. <sup>37</sup> Wate aiwaiei am lawana ma gimara-melei. <sup>38</sup> Mepa da aiai: tau ma au viararamana ina vinimalei; ma i mae-puputeu; ma ana ġoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni.”

## 9

<sup>1</sup> Ma Iesu, wenanare i riwei, “Taumi a ririwana-kauemi; rava ġelaumi weka o maimairi amapo eōa

---

† **8:34:** Wei lamna awanaina. Anona lamna Iesu ana tauvotaōtaōgo anina vinimala ma apoapoei ina nelāgai aubaina taui, tauna i votaōtaōgoi. Tauna eōa ita ririwa da ana tauvotaōtaōgo au korosi ina iraġe me tauna.

ona iraġe da God ana vigulau ona inanai ana rewapana ina nei.”

*Iesu inanana i virai  
(Matthew 17:1-13; Luke 9:28-36)*

<sup>2</sup> Au pom six muriai, Iesu, Peter, James ma John i taravaini. Ma taui ava i ġae ola ġaeġaena au tepana. Ma kampa taui au matai, Iesu inanana i virai. <sup>3</sup> Ana gara i arapoira ma gamrina i vimata-kamokamota; eġa me aiwai ġelauna au dobu nanare. <sup>4</sup> Ma kampa au matai, Elijah ma Moses i eġa. Ma Iesu maiteni i bababani. <sup>5</sup> Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!” <sup>6</sup> Ma taui i rovo kaua ma Peter eġa ita aramanei da aiwai i latolatoni.

<sup>7</sup> <sup>✡</sup>Anina ma apau i eġa ma taui i purui. Ma pona apauei i opu ma i riwa i pa, “Wei Tau Natu au nuavainana, ona rautaniġanei!” <sup>8</sup> Maratagogi taui i ’nana viravira ma eġa aiai ġelauna ita inanai ma Iesu, tauna ava.

<sup>9</sup> Ma maranai olei i ġaigairai ma Iesu, taui i viġaei da aiwai i ’nananaia eġa ina vieġai da au naona Rava Natuna iraġelei ina vomairi me.

<sup>10</sup> Ma taui, wei riwana i votetelelei ma i babani vivira i pa, “Iraġelei vomairi me anona aiwai?”

<sup>11</sup> Ma taui, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”\*

---

<sup>✡</sup> **9:7:** Mrk 1:11    \* **9:11:** Mai Jew i vitumaġana da Elijah au naona ina nememei ma Keriso muriai ita nei. (Mal 3:1, 4:5-6). Ma taui eġa ita notai da Elijah rau-ivipaopoe ina nelaġan ana au nememei.

<sup>12</sup> Iesu i paribelei, “Riwa kaua Elijah au naona ina nei da aiwai anatapuna ina vokaukauei. Aubaina wariaġa i girumi da Rava Natuna ina vinuapoapoe kaua ma ina inana-geduaiei. <sup>13</sup> Wate a ririwana-kauemi da Elijah anina i nei ma rava, ai ġoanei tauna i rau-iviapoapoelei me i girugirumia nanare.”†

*Iesu, arua-apoapoena tevera orotona awarina i viopuni*

*(Matthew 17:14-21; Luke 9:37-43a)*

<sup>14</sup> Iesu ana tauvotaġotaġo tonuġa maiteni olei i ġaira memei ai rava awari ma patara ġaeġaena, taui i gariġuruvi. Ma Jew ai tarawatu babadai, taui maiteni i vivitarapiri. <sup>15</sup> Maranai patara, Iesu i ’nanai. Taui orai i aeupai ma awarina i ruba ma i viegualaei. <sup>16</sup> Iesu, taui i vitara-virevirei, “Aiwai o vitarapiriei?”

<sup>17</sup> Oroto tagogi patara au poui i paribelana, “Tau-viararamana, arua-apoapoena natu orotona au orana e mamae ma i kaei da eġa ita bababani, lamna aubaina a neiae awarim. <sup>18</sup> Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ġiriġiriei; ma inina e badobado. Am tauvotaġotaġo a vibaġai da arua-apoapoena ita viopuni, wate eġa tagotagogina da ita kaei.”

<sup>19</sup> Ma Iesu i paribelei, “Oo mara aiwai ona vitumaġana! Ta mae ġaġa ma ami vita ana ’vara ġaġalei? Tevera awariu ona neiae!”

---

† **9:13:** Iesu lamna John Taubabataito i bababaniei da tauna Elijah (Mat 11:13-14, 17:10-13)

**20** Ma tevera i neiai Iesu awarina. Ma maranai arua-apoapoena, Iesu i 'nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro. **21** Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai. **22** Arua-apoapoena mara au anatapuna, tauna ai au araratana ma au waira e tawatawanei ma i ġoei da ita viraġeni. Mepa da tam tagotagogina; ma raunu'apoapoelelai ma ma voaguiai!”

**23** Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana e vivitumaġana, God anatapuna ina kaei tauna aubaina.”

**24** Maratagogi tevera amana i garara, “A vitumaġana, wate au tumaġana eġa ita rata ma ma voaguiu da ina rata!”

**25** Iesu i 'nana da patara i rierieiai awarii ma lamna aubaina arua-apoapoena i egari i pa, “Tam arua tanīga-potapotana ma gumgum. Tau a egaegarim da tevera ma opu-tawanei. Ma eġa melanai au orana ma rui me!”

**26** Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maġamaġau kampa i riwa, “Tauna i'rāġel!”

**27** Ma Iesu, tauna urana i vojjini ma i sinaepai da i mairi.

**28** Muriai Iesu, ana tauvotaġotaġo maiteni i rui au numa. Ma maranai taui ava ma i paridadanei i pa, “Aiwai aubaina tauai eġa tagotagogina da arua-apoapoena ata viopuni?”

**29** Iesu, i riwa, “Arua-apoapoei me wenanare, pari ainelana ina viopuni.”

*Iesu ana iraġe i babaniana-melei  
(Matthew 17:22-23; Luke 9:43b-45)*

<sup>30</sup> Iesu, ana tauvotaġoġo maiteni dobuna i netawanei ma Galili i verautuini. Iesu eġa ita ġoei da rava ita aramanei da taui mepa. <sup>31</sup> Aubaina tauna, ana tauvotaġoġo i viararamani i pa, “Taui Rava Natuna ina amverenei rava ġelaui au urai. Ma taui ina viraġeni. Wate au pom tonuġa au murina ina vomairi me.”

<sup>32</sup> Wate taui eġa ita aramanei tauna aiwai i bababaniei. Ma pari-dadanana i rovoei.

*Tauvotaġoġo i vitarapiri vivira da aiai i ġetelara  
(Matthew 18:1-5; Luke 9:46-48)*

<sup>33</sup> Iesu ana tauvotaġoġo maiteni i ġeta au Capeniam ma au numa i rui. Ma Iesu, taui i vitara-virevirei, “Au etanai aiwai o vitarapiriei?”

<sup>34</sup> Wate taui i genuana, aubaina au etanai taui i vitarapiri vivira da aiai i ġetelara. <sup>35</sup> \*Iesu i kiala ma Apasol 12 i raukwatuei awarina ma i riwei i pa, “Aiai e ġoegħoe da ina vibada. Tauna ina tereġairana-melei ma ina vimuri dewadewa ma ina vitaunola rava aubai.”

<sup>36</sup> Ma Iesu, tevera i vaia ma au pou i vimairini. Ma urana au jiġona i tere-taġonei. Ma taui i riwei i pa, <sup>37</sup> “Aiai ravana; tau wavauei, tevera wenanare i rauġorei. Lamna tau maiteni e raraugħoreiu. Ma aiai da tau e raraugħoreiu. Lamna tauparitawaneu maiteni e raraugħorei.”

*Aiai eġa ata ġavia, lamna turata  
(Luke 9:49-50)*

---

\* <sup>35:</sup> Mrk 10:43-44

**38** Anina ma John, Iesu i riwei, “Tauviararamana! Tauai, oroto tagogi a inanai; tam wavamei aruaapoapoena i viviopuni ma tauna ega turata. Lamna aubaina a vigaei da ega ina kauana-melei.”

**39** Iesu i riwa, “Ega ona vigaei! Ega aiai au wavau kaua babai ina kauei ma muriai ina parivaiapoapoenu. **40** Aiai ravana ega ata gavia; lamna turata. **41** Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotagota. Taui ai maia ega ina vine-boai.”

*Raelara babanina  
(Matthew 18:6-9; Luke 17:1-2)*

**42** Aiai ravana i kauei da wei teverana ana tumagaña Tau awariu i viapoapoeni da go'apoapoe i kauei. Lamna i ai da gaima gaegaena ravana au uatabana ina duri ma au boga ina tawanei aubaina God, tauna ina kovoغا-guratei. **43-44** Mepa da nimam i kauem da go'apoapoe u kauei. Ma boritawanei! I aii da nimam tagogiava ma lawana mamae-nonoana ma vaia. Ma ega ma kauei da nimam ruaga aiaii ma ma nae ai au menamenana; mepa ai ega melanai ita bobo.† **45-46** Mepa da aem i kauem da go'apoapoena u kauei. Ma boritawanei! I aii da sigesigem au lawana mamae-nonoana ma rui. Ega me aem ruaga aiaii ma ai au menamenana ina tawanem.‡ **47** Ma mepa da matam ina kauem da go'apoapoena u kauei. Ma vaitawanei! I aii da matam tagogi ma God ana vigulau ma rui. Ega me matam ruaga ma ai

---

† **9:43-44:** Wariaga nimaiei i giruma damanei taui riwana tagogina me vs 48. § **9:45-46:** Wariaga nimaiei i giruma damanei taui riwana tagogina me vs 48.

au menamenana ina tawanem; <sup>48</sup> dobuna motamotana ega ita irairage ma ai ega ita bobo.

<sup>49</sup> Au Tauvotaoga anataputapui, ai araratanei ina bogai.

<sup>50</sup> “Nia i ai lam viaiainana aubaina. Ma mepa da i tomatoma, mena ma vidagianei. Nia au orami ina mae ma ona viturana vivira!”

## 10

### *Iesu, tavine vilamonana i babaniei*

<sup>1</sup> Ma Iesu, dobuna i netawanei ma i nae Judea ana paratana. Ma Waira Jordan i damani da au baba gelauna. Patara gaegeena i riana-melei. Ma Iesu i viararamana, me mara patapatana i kaukauei nanare.

<sup>2</sup> Ma Pharisi gelaui i goei da tauna ita waroi. Ma lamna aubaina i vitara-virevirei, “Tarawatu e mamae bo ega da rava, awana maiteni ita vilamonei?”

<sup>3</sup> Ma Iesu i paribelei, “Moses ana Tarawatu aiwai e ririwei?”

<sup>4</sup> Ma taui i riwa, “Moses ana Tarawatu e ririwa da oroto *vilamona pepana ina girumi ma awana ina verei*. *Ma taui ina vilamonei*.”

<sup>5</sup> Iesu i paribelei, “Taumi orami i bada. Au baina Moses wei Tarawatuna i terei. <sup>6</sup> <sup>✳</sup>Wate ona notai da au karena, maranai God rava i kaei *ma tauna oroto ma wavine i kaei*. <sup>7</sup> <sup>✳</sup>Ma lamna aubaina oroto amana ma alona ina netawanei <sup>8</sup> *ma awana maiteni ina vitagogi* da taui ega ruaiga me au naona ma tupua tagogi. <sup>9</sup> God aiwai i vitagogie, ega aiai ina vilamonei.”

<sup>✳</sup> **10:6:** Gen 1:27    <sup>✳</sup> **10:7:** Gen 2:24

**10** Maranai taui i naeme au numa, ma tauvotağotağo, Iesu i vitara-virevirei wei kauai aubaii.  
**11** Iesu i paribelei, “Mepa da oroto, awana i voterei. Ma wavine ġelauna i ravağī. Lamna tauna, awana awarina i rauviapoapoe. **12** Ma nanarena mepa da wavine, awana i voterei ma oroto ġelauna i ravağī. Lamna awana, awarina i rauviapoapoe.”

*Iesu, roaroa i viaiaini*

**13** Rava ġelaui, roaroa i neiai Iesu awarina da urana au tepai ita terei. Ma ana tauvotağotağo, ravai i viğaei. **14** Maranai Iesu wei kauai i 'nanai. Ma ana tauvotağotağo i eni ma i riwa, “Roaroa ona voterei da awariu ina nei. Ma eğä ona viğaei. Au baina God ana vigulau, lamna rava wenanare aubai me wei roaroai. **15** A ririwana-kauemi. Aiai, God ana vigulau eğä ina vaia me tevera aburuna nanare. Tauna, eğä God ana au vigulau ina rui.” **16** Ma roaroa i taravaini ma i rapai, urana au tepai i terei, i raupari ma i viaiaini.

*Purapura ravana*

*(Matthew 19:16-30; Luke 18:18-30)*

**17** Ma maranai Iesu i vomairi da i nenaē. OROTO i ruba ġeta ma au naona i raudune ma i riwa i pa, “Taugiu vinualaulaunam. Aiwai ana kauei da lawana maemae-nonoana ana vibuderiei?”

**18** Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana. **19** ♫Tam, God ana Tarawatu u aramanei, *Eğä ma virağena!* *Eğä ma awadanene!* *Eğä ma danene!* *Eğä ma viwavu-moru!* *Eğä ma amkwalakwala!* *Amam ma Alom ma vivirei!*”

---

❖ **10:19:** Exo 20:13; Exo 20:14; Exo 20:15; Exo 20:16; Exo 20:12

**20** Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

**21** Iesu, tauna i ’nanai ma i vinuavainei ma i riwei, “Kaua tagogi e mamae e āga uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaāgotaāgoi!”

**22** Ma maranai oroto wei riwana i nonori. Naona i peu ma ana nuabolana i nae; aubaina tauna, purāpura ravana.

**23** Iesu i ’nana viravira ma ana tauvotaāgotaāgo awari i riwa, “I piripiri kaua da purapura ravana, God ana au vigulau ina rui.”

**24** Tauvotaāgotaāgo riwana i baiei maranai Iesu wenanare i babani. Ma Iesu i riwa me, “Natunatu! I piripiri kaua da purapura ravana,\* God ana au vigulau ina rui. **25** I telatela kaua da āgamoāgamo āgēgāena wavana kamel, īgoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

**26** Taui i vinuanaina ma ai nota i kwa. Ma taui aya i babani vivira i pa, “Mepa da nanare; amapo aiai lawana mamae-nonoana ina vaia?”†

**27** Iesu awarii i ’nana ma i riwei, “Rava awarii wei kauai i piripiri. Wate āga God awarina. God awarina aiwai anatapuna i telatela kaua.”

\* **10:24:** Wei riwana buka āgelaui awarii e mamae ma āgelaui āga purapura ravana. † **10:26:** Mai Jew i notai da rava vipurapurai lamna BADA ana verena ana nuavaina matairana, taui e notai da BADA, rava vipurapurai āga ina gagaloei, tauna ravai āgelaui maiteni āga ina gagaloei.

<sup>28</sup> Ma Peter i riwei, “Ma tauai menanare? Tauai ai purapura a voterei ma tam a votaḡoim.”<sup>†</sup>

<sup>29</sup> Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaḡotaḡoi; tau ma Riwana Aiaina aubaina. <sup>30</sup> Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anatapui ina maḡa. Rava ina rau-iviapoapoelem; aubaina tam, tau au Tauvotaḡotaḡo da mara au murina tauna lawana mamae-nonoana ina vaia. <sup>31</sup> Wate maḡamaḡaui marina e vivinao; taui ina vimuri. Ma maḡamaḡaui da e vivimuri; ina vinao.”

*Iesu ana iraḡe babanina i vitonui  
(Matthew 20:17-19; Luke 18:31-33)*

<sup>32</sup> Iesu, ana tauvotaḡotaḡo maiteni i ḡeḡae au Jerusalem. Iesu, taui au naoi i neneae. Tauvotaḡotaḡo i baiei. Ma rava ġelaui au muri i nenei i rovo kaua.<sup>§</sup> Ma taui 12 i rauḡorei au ririva ma i raukarei da kaua amapo da awarina ina tupua; taui i vieḡei <sup>33</sup> I pa, “Ona inana, tauta ta ḡeḡae au Jerusalem. Ma Rava Natuna ina verenei pirisi babadai; ma tarawatu babadai awarii. Ma taui ana iraḡe ina vianinei. Ma Mai Jentail ina verei. <sup>34</sup> Ma tauna ina vijiboġi ma ina ovai ma ina kwapui

---

<sup>†</sup> **10:28:** Peter i ḡoei da ita aramanei da tauvotaḡotaḡo ai au iraḡe maiana aiwai, ina vaia.      <sup>§</sup> **10:32:** Iesu i ḡeḡae au Jerusalem ma rava maḡamaḡaui i viġavie i lamna aubaina ana tauvotaḡotaḡo i baiei da tauna tepana i tora da weka i neneae. Rava ġelaui i votaḡotaḡo, taui i rovo kaua da aiwai awarina ina tupua maranai i ḡeta au Jerusalem.

ma ina viraġeni. Au pom vitonuina ina vomairi me.”

*James ma John ai vibagħa  
(Matthew 20:20-28)*

**35** - Zebedi natunatuna James ma John i nei Iesu awarina ma i vibagħai i pa, “Tauviararamana! Tauai ai ġoana a vivibagħi uta kaei.”

**36** Iesu i riwa i pa, “Aiwai o ġoegħoei ana kaei aubaimi?”

**37** Taui i paribelana, “Ma verelai da ana kiala, tagogi au oiem ma ġelauna au kelakelaum am au vigulau.”

**38** Iesu i paribelei, “Taumi eġa ota aramanei aiwai o vivibagħi! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoi?\*”

**39** I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraġe me tau ana iraġe. **40** Wate tau au rewapani eġa ita mamae da ana veremi da mepa ona kiala au oieu bo au kelakelau. God, rava i vinevinei; taui ai gabu i vokaukauei.”

**41** Maranai Tauvotaġotaġo 10 ġelaui, wei riwana i nonori. Taui James ma John awarii i ġaiawa.

**42** Ma Iesu, taui anatapui i ġorei da awarina ma i riwei, “O aramanei da jentail ai babada, dobu ġela

\* **10:38:** ...babataito me tau ina babataitoi taui iniviara ma iraġe e babbaniei, maranai Iesu au Gethsemani i raraupari muriai da ana iraġe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelāġai.

ravai jentail awarii e mamae-ḡaeḡae ma e raraui-viapoapoelei. Wate taui ai babada ḡaeḡaei, ai rewapana i ġetelera da ai rava e vibadebadei da ai ḡoana e kaukauei. **43** ✧Wate au tauvotaḡotaḡo eḡa nanare. Eḡa da aiai i ḡoei da ina ġetelara taumi au poumi; tauna anina da ina vitaunola. **44** Aiai i ḡoei da ita vinao. Tauna ina vitaunola rava anatapui aubai. **45** Ma nanare Rava Natuna eḡa ita nei da tauna, tana nolei. Wate ita vitaunola rava aubaii. Ma ana lawana ita verenei da rava maḡamaḡaui ai lawana ita gimara-melei.”†

*Iesu, rava mata-potapotana Batimeus i vilawani  
(Luke 18:35-43)*

**46** Ma taui i ġeta au Jeriko. Iesu, ana tauvotaḡotaḡo, patara ḡaeḡena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgigimana. **47** Maranai i nonori da tauna, Iesu Nasareti; garara i raukarei i pa, “Iesu, tam David natuna! Ma raunu’apoapoeleu!”‡

**48** Rava maḡamaḡaui, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

**49** Iesu i tumairi ma i pa, “Ona ḡoreiai!”

---

✧ **10:43:** Mrk 9:35    † **10:45:** Iesu i vinuapoapoe ma iraġe aubaita me Isaiah i girugirumia nanare au Isa 52:13-53:12.    † **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaġa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)

Anina taui, mata-potapotana i ġoreiai i pa,  
“Tepam ina tora ma ma vomairi! E ġoreġorem!”

<sup>50</sup> Tauna, ana puru i tawanei ma i vomairi laġilaġina ma i nei Iesu awarina.

<sup>51</sup> Iesu i paridadana i pa, “Aiwai u ġoei ana kauel Aubaim?”

Mata-potapotana i paribelei, “Tauviararamana!  
A ġoei da ana inana me.”

<sup>52</sup> Iesu i riwa, “Ma nae! Am tumaġana i vilawanim.”  
Maratagogi tauna i ’nana me ma Iesu au eta  
i votaġotaġoi.

## 11

*Iesu i rui au Jerusalem*

(Matthew 21:1-11; Luke 19:28-40; John 12:12-19)

<sup>1</sup> Ma maranai Jerusalem i tuġereġerei ma i rui au Betphagi ma Bethani\* au ola Olives. Ma ana tauvotaġotaġo ruāga i paritawanei, <sup>2</sup> ma i riwei i pa, “Ona nae au melagai au naomi. Maranai o ruirui, kampa *donki* natuna ġauba, raġiraġitana ona nelāgai. Tauna eġa aiai ita gerudanei. Ona rupeni ma ona neiae.† <sup>3</sup> Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ġoeġgoei ma maratagogi ina paritawana-melei.’”

<sup>4</sup> Ma i nae ma *donki* ġaubona au doa au metaeta raġiraġitana i rupeni. <sup>5</sup> Rava ġelaui kampa i maimairi

---

\* **11:1:** Eng. Bethphage & Bethani. † **11:2:** Mai Jew awari, donki lamna nola aubaina ma eġa gulau ana anigeru. Donki i gerui lamna e ririweta da tauna gulau ana nuaubana ma vilamolamom-nana i nei.

i paridadana i pa, “Aiwai o kaukauei *donki* ġaubona o ruperupeni?”

<sup>6</sup> Ma i paribelei me Iesu i ririweia nanare ma taui i voterei da i nae. <sup>7</sup> Taui *donki* i neiai Iesu awarina ma ai puru au uporana i tawana-epai ma au tepana Iesu i kiala. <sup>8</sup> Ma rava maġamaġaui, ai puru au eta i ebanī ma ġelaui, ai rugurugu i tarataraia i ebanī. <sup>9</sup> Taui i vivinao ma taui au muri i nenei i garara:

“Hosanna!”†

“Viviaiainana tauna BADA au wavana e nenei!”

<sup>10</sup> “Viviaiainana amata David ana vigulau e nenei!”

“*Hosanna* au aidamo telarana!”

<sup>11</sup> Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, taui 12 maiteni.

*Iesu, damala aina i parivai-irairaġeni  
(Matthew 21:18-19)*

<sup>12</sup> Ma marana i tom, taui Bethani i opu-tawanei ma Iesu am-iraġe. <sup>13</sup> Au weia ma damala aina i ’nanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, aubaina eġa damala ana mara. <sup>14</sup> Iesu, damala aina i riwei i pa, “Eġa aiai amadodo ma amapo anom ina am-melei!” Ma ana tauvotaġo i nonori aiwai i latoni.

*Iesu, taugimara tempolei i viäġaġana-opunei  
(Matthew 21:12-17; Luke 19:45-48; John 2:13-22)*

---

† **11:9:** Lamna pona Aram anona ma vilawaniai ma muriae lamna viegualau ma vimae-ġaġaena aubaina.

**15** Maranai tau i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina§ ai kepakepa ma gabubu taugimareina ai anikiala i vitauvirai. **16** Ma i viġaei da eġa aiai ana gimara Tempol au orana ita avarainiae. **17** ✽Ma rava i viararamani i pa, “I girugirumia nanare,

‘Au numa ina ġorei pari numana  
dam anatapui au dobu aubaii.’

Wate taumi o vovirai da kwalakwalai ai guba.”\*

**18** Pirisi Babadai ma tarawatu Babadai i nonori ma i ogei da ita virāgeni. Taui, Iesu i rovoe aubaina patara ana viararamana i baiei.

**19** Ma au bigai Iesu ana rava, Jerusalem i oputawanei.

*Damala aina i poi*  
*(Matthew 21:20-22)*

**20** Ma ubaubanai tau i nena ma damala aina i 'nanai anatapuna i poi. **21** Peter i notai ma i riwa “Tauviararamana ma inana! Damala aina u parivai-irairaġenia i poi.”

**22** Iesu i paribelei, “God ona vitumaġanei!

**23** A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuantuana eġa ina raġaraġa ma ina vitumaġana

§ **11:15:** Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelaui i virai da Tempol mane wei lamna Jew tarawatu i vianinei gimara au Tempol aubaina (Exo 30.13). ✽ **11:17:** Isa 56:7 \* **11:17:** Iesu dobuġela manena tauviraina ma gimara ravai i viwavui da taui pari numana i vovirai da amkwalakwalai ai guba, taui rava ai arua nolana e viviapoapoeni Jer 7:11-15.

da aiwai e ririweia, ina tupua. <sup>24</sup> Lamna aubaina a ririwemi. Aiwai ami au pari o vibağei, ona vitumağana da taumi boibogi o vaia ma ina viğarimiei. <sup>25</sup> Ma maranai e raraupari, au naona rava anatapui ai gó'apoapoe awarim ma nota-tawanei. Ma nanare amam au mara am gó'apoapoe ina nota-tawanei.”†

*Jew babadai, Iesu ana vibadana i vitarapiriei  
(Matthew 21:23-27; Luke 20:1-8)*

<sup>27</sup> Taui i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina. <sup>28</sup> Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kauei?”

<sup>29</sup> Iesu i paribelei i pa, “Au vitaraviravira tagogi ana terei ma ona paribeieu. Ma ana riwemi; aiwai vibadanei wei kauai a kaukauei. <sup>30</sup> Aiai, John tababataito vibadana i verei da rava ita babataitoi, God bo rava? Ona riweu!”

<sup>31</sup> Taui i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina ega ota vitumağanei?’ <sup>32</sup> Wate ega tana riwa da, ‘Ravei.’ Taui rava i rovoei, aubaina rava anatapui, ai nota da John anina peroveta. <sup>33</sup> Ma i paribelei, “Tauai ega ata aramanei.” Iesu i riwa, “Tau nanare ega ana riwemi aiwai vibadanei wei kauai a kaukauei.”

---

† **11:25:** Riwa wadubo nonoana uraiei i girugirumia vs 26 weka ega ita mamae, Mepa da rava ai apoapoei ega ma nota-tawanei, amam au mara nanare am apoapoei ega ina nota-tawanei.

# 12

*Tauipi ai awanaina  
(Matthew 21:33-46; Luke 20:9-19)*

<sup>1</sup> <sup>✧</sup>Iesu i vikarei ma awanainei awari i babani i pa, “Mara tagogi oroto, ana wapu i kaeui ma grape i paewi\* ma i gari ma grape anigudana ma violaḡa numana i voai. Ma tauipi ġelaui i verei da ita nolei taui anatapui aubai. Ma i vaḡai au dobu ġela. <sup>2</sup> Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia. <sup>3</sup> Wate tauipi, tauna i vojijini ma i kwapui ma kwakwavina i paritawanei. <sup>4</sup> Ma taniwaga, taunola ġelauna i paritawanei. Ma taui, kolana i viaibauni ma i vitepaubaubai. <sup>5</sup> Ma taunola ġelauna i paritawanei ma tauna i viraġeni ma i maġa ġelaui i paritawanei, ġelaui i kwapui ma ġelaui i viraġeni. <sup>6</sup> Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Taui, natu ina vivirei.’ <sup>7</sup> Wate taui, tauna i ’nanai ma i riwa vivira i pa, ‘Wei taniwaga natuna. Ona nei, tana viraġeni ma ana buder i ina viġaritaiei!’ <sup>8</sup> Ma i vunui ma i viraġeni ma tupuana wapuei i tawanana-opunei.

<sup>9</sup> —Wapu taniwagana marina aiwai ina kaeui taui awarii? Tauna ina nei ma tauipi ina viraġeni ma grape wapuna ina veredamanei tauipi ġelaui awari. <sup>10</sup> Wei girumana o iavi bo eġa?

*‘Wei ġaimana, tauvoa i geduaiei,  
wate muriai i nelaġai da tauna ġaima kaua.*

---

\* **12:1:** Isa 5:1-2      \* **12:1:** Parivainota wadubona, God au anatapuna Israel e bababaniei me tauna ana grape wapuna, me Isa 5:1-2.

**11** *Wei lamna, BADA ana kaua  
ma inanana i vinualaulauna.*” (*Psalm 118:22-23*)

**12** Jew babadai i aramanei da awanaina lamna taui i bababaniei ma i ġoei da ita pani. Wate taui patara i rovoei, lamna aubaina Iesu i voterei ma i nae.

*Caesar awarina tax tana terei bo eġa?  
(Matthew 22:15-22; Luke 20:20-26)*

**13** Ma Pharisi ġelaui ma Herod ana rava ġelaui i nae Iesu awarina da riwei ita waroi. **14** Taui i nei ma i riwa, “Tauviararamana, tauai aramanei da tam rava jijimanim. Ma rava wavai naenaei ma rava labalababa eġa uta vibainaenaei ma anatapui e vaivaia da tagogi. Wate tam God ana babani riwa kauei e viararamani. Ma riwelai tax tana terei Rome gulauna wavana Caesar† awarina, i aii bo eġa?”

**15** Wate Iesu, ai moru i ’nana-bauni ma i riwei, “Aiwai aubaina o raudadani? Mani tagogi ona neiae da ana inanai!”

**16** Denarius tagogi i neiae Iesu awarina ma taui i vitara-virevirei, “Wei aiai aruana ma wavana?”

I paribelei, “Caesar.”

**17** Iesu i riwa, “Aiwai Caesar ġarinei, Caesar ona verei. Ma aiwai God ġarinei, God ona verei!” Ma taui i baiei.

*Sadusi ġelaui, Iesu i vitara-virevirei irairaġelei vo-mairina aubaina  
(Matthew 22:23-33; Luke 20:27-40)*

---

† **12:14:** Sisa.

**18** <sup>◊</sup>Mai Sadusi ai vitumaḡana da rava eḡa ita vovomairi-me maranai e irairaḡe.<sup>‡</sup> Anina ma ġelaui i nei Iesu awarina ma i paridadanei, **19** “Tauviararamana! God ana tarawatu, Moses wenanare i girumi: Mepa da oroto i’raḡe ma kaiababana i netawanei ma eḡa natunatui. OROTO vareina kaiababana ina ravaḡi ma roaroa ina ġuni vareina aubaina. **20** Mara tagogi varevarei seven i mae. Ma natuevou i tavine ma eḡa natunatuna ma oroto i’raḡe. **21** Vareina viruaina kaiababa i ravaḡi ma tauna maiteni eḡa natuna ma i’raḡe. Ma nanare vareina vitonuina. **22** Ma nanare anatapui seven, wavinena i ravaḡi ma eḡa natunatui. Au muriae wavine i’raḡe. **23** Anatapui seven, wavinena i ravaḡi. Vomairi me au marana, lamna aiai awana?”

**24** Iesu, taui i riwei, “Aiwai Moses i girumi ma God ana rewapani eḡa ota aramanei. **25** Maranai taui iraḡelei ina vomairi, taui eḡa ina tavine bo ina vitavinei. Wate ina mae me anela au mara. **26** <sup>◊</sup>Ma rava iraḡelei ai vomairi babanina, Moses ana tarawatu eḡa ota iavi bo? Mepa aii ararata lana, kampa God Moses i riwei: *Tau Abraham ana God ma Isaac ana God ma Jacob ana God.* **27** Tauna eḡa rava irairaḡei ai God, wate rava lawalawai ai God.

---

<sup>◊</sup> **12:18:** Act 23:8    <sup>‡</sup> **12:18:** Sadusi taui gulagulau ma rava ġaegaei mai Jew ai giu babadai taui maiteni eḡa ita vitumaḡana da anela bo arua ġelaui e mamae ma buka 5 i vinao, Moses i girugirumia, taui lamna ava e vivitumaḡanei (Karena, Exodus, Leviticus, Numbers, Deuteronomy). Ma eḡa buka ġelaui. Wate Moses ma BADA riwaiei taui i viatataiei da lawana e mamae iraḡe au murina. <sup>◊</sup> **12:26:** Exo 3:6

Taumi o moru kaua!§”

*Tarawatu ġeġetelarana  
(Matthew 22:34-40; Luke 10:25-28)*

<sup>28</sup> Ma tarawatu badana tagogi i nae ma ai vitrapiri i nonori. Ma i nonori da Iesu i babani kaua, lamna aubaina tauna i vitara-viravira, “God ana tarawatu metauna i ġetelara?”

<sup>29</sup> ☩Iesu i paribelei, “GeVęgetelarana tagogi lamna wei: *Ona rautanigana Israel!* BADA *ata God, tauna ava BADA.* <sup>30</sup> BADA *ami God nuantuami ina vaia orami anatapunei ma aruami anatapunei ma ami nota anatapunei ma ami rewapanan anatapunei!* <sup>31</sup> ☩Ma viruaina lamna wei: *Rava ġelaui nuantuam ina vaia me tam nuantuam e vaivai-melei!* Wei tarawati ruāga i ġetelara, eġa me ġelaui nanare.”

<sup>32</sup> Tarawatu badana i riwa, “Tauviararamana u babani kaua! Riwa kaua u babaniei, BADA *Tauna ava God ma eġa mepa ġelauna.* <sup>33</sup> Ma *nuantuami ina vaia orami anatapunei ma ami nota anatapunei ma ami rewapanan anatapunei.* Ma, *Rava turam nuantuam ina vaia me tam nuantuam e vaivai-melei.* Wei tarawatui ruāga lamna i ġetelera, eġa me pulo apuapunana bo pulo ġelaui.”

<sup>34</sup> Iesu i ’nanai da tauna i paribelana kaua ma i riwei, “Tam, God ana vigulau au ġereġerena e ġeġeta.” Ma eġa aiai tepana ita tora da Iesu ita vitara-viravirana-melei.

*Keriso tauna aiai?  
(Matthew 22:41-46; Luke 20:41-44)*

---

§ **12:27:** ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, taui lawalawai maranai BADA, Moses awarina i babani. ☩ **12:29:** Deu 6:4-5 ☩ **12:31:** Lev 19:18

**35** Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?  
**36** <sup>◊</sup> Arua Vivivireina, David nota i verei ma tauna i riwa:

‘MAMAE-NONOANA *au gulau i riwei,*  
*Au oieu ma kiala*  
*da am ġavia*  
*au ae karem da ma tuvaidoedoei.’*      (*Psalm 110:1*)

**37** —David, tauoina wei gulauna i ġorei *bada*. Ma menanare da badana lamna, David natuna?” Patara ġaeġaena riwana i nonori ma i vinuaiai.

*Iesu, Tarawatu Babadai ai kaua i babaniei  
 (Matthew 23:1-36; Luke 20:45-47)*

**38** Ma Iesu, taui i viararamani i pa, “Tarawatu babadai ona rovoei. Ai gara manamanai ma e bababara nae au deba da rava taui e vivivirei.

**39** Taui anikiala vinevinei pari au numana ma au torela, gabu aiai e vaivaia. **40** Taui, kaikaiababa e morumoru ma ai numa e kwalekwalei, e morumoru ma e raraupari-vai-manamanawa. Taui ai kovoġa ina apoapoe guratana.”

*Kaiababa ana pulo  
 (Luke 21:1-4)*

**41** Ma Iesu, pulo aniterenana au baba ġelauna i kiala ma rava i 'nananai mane i tereterei. Rava maġamaġaui vivimanei, mane maġamaġaui i terei.

**42** Wate kaiababa molamolakana i nei ma mane muomuoī ruaġa i terei, ruvana i aburu kaua. **43** Ana tauvotaġotaġo i ġorei ma i riwei, “Anina a ririwemi, wei kaiababa molamolakana i tere-guratei, eġa me

---

<sup>◊</sup> **12:36:** Psa 110:1

taui ġelaui. <sup>44</sup> Taui ġelaui ai maurei i verena, wate wei kaiababa molaka ma ġarinei anatapuna i terei, ana anilawana anatapuna.”

## 13

*Iesu i riwa da rava God ana Tempol ina rikai  
(Matthew 24:1-2; Luke 21:5-6)*

<sup>1</sup> Iesu, Tempol i nene-tawanei ma ana tauvotaġotaġo tagogi i riwa, “Tauviararamana! Numa i viġulau ġaġa ma numa ġaimai i rata ġaġa.”

<sup>2</sup> Iesu i paribelei, “Wei numai ġaeġaei u inanai, eġa ġaimai tagogi, turana au tepana ina mae. Ĝaima anatapui ina rikai.”

*Rava ina vinuapoapoe kaua. Iesu ana  
tauvotaġotaġo ina vipatutu  
(Matthew 24:3-14; Luke 21:7-19)*

<sup>3</sup> Iesu i kiakiala au ola Olives, Tempol au navanavaġela ma Peter, James, John ma Andrew i nei ma i vitaraviravirana govaġei <sup>4</sup> i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

<sup>5</sup> Iesu, taui i riwei, “Ona inana kaua da eġa aiai ina terevaideġaimi! <sup>6</sup> Rava maġamaġaui, wavauei ina nei ma ina riwa, ‘Tau Keriso tauvilawana! Ma rava maġamaġaui ina terevaideġai. <sup>7</sup> Ma maranai viġavia ona nonori ma viġavia aueia riwana ona nonori; eġa ona rovo! Wei kauai anina da ina tupua, wate wei eġa damona. <sup>8</sup> Dam, damai ina viġavia vivira ma dobu, dobuai ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviara e vivikarei maranai e vivinatuna.

**9** —Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaḡotaḡoiu. Ma taui awarii, Riwa Aiaina ona raugugulei. **10** Riwana Aiaina ona raugugulei rava anatapui awari ma muriai damona ina nei. **11** Ma maranai i panimi ma i etaremi. Eḡa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eḡa taumi ota babani, wate Arua Vivivireina. **12** Rava, vareina ina verenei da ina viraḡeni. Ma ama, natunatuna ina verenei da ina viraḡeni. Ma roaroa, amamai ma aloloi ina viḡavie i da ina iraḡe. **13** Rava anatapui ina geduaiei tau aubaiu. Wate aiai da e maimairijina da au damona, tauna ina lawana.”

*Iniviara ġaegħaena ana mara  
(Matthew 24:15-28; Luke 21:20-24)*

**14** “Maranai ‘Kaua apoapoe kaukauana’\* e maimairi mepa avena ita mairi. (Buka tauiavana wei ina aramanei anona aiwai). Taui aiavoi au Judea ina ruba laġilägħina au ola. **15** Aiai numa au tepana eḡa ina ġaira bo ina rui au numa da aiwai ina vaia. **16** Aiai au wapu eḡa ina naeme au numa da ana gara ina vaia. **17** Ma iniviara ġaegħaena, waivine duaduamai ma taui da e viviġu awari nai au marana! **18** God awarina ona raupari da wei kauai eḡa au bodu ina tupua. **19** ◊Ma nai au marana amapo iniviara ġaegħaena. Ma maranai God dobu i kauei, iniviara ġaegħaena eḡa nanare ita tupua ma

---

\* **13:14:** Eng. *Abomination of Desolation* Dan 9:27 11:31 & 12:11  
◊ **13:19:** Da 12:1

amapo ēga nanare ina tupua me. <sup>20</sup> Wate BADA nai marana ina vitupoi. Mepa da ēga ina vitupoi, rava anatapui ina irāge. Wate rava, tauna ana vinevine ina vilawani lamna aubaina mara ina vitupoi.

<sup>21-22</sup> —Muriai keriso tauvilawana morumorui ma peroveta morumorui ina nei ma mataira ma kaua babai ina kaei ma ina kauana dadanei da God ana vinevine maiteni ita terevaidegāi. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina ēga ona vitumağanei! <sup>23</sup> Ona inana kaua; anatapuna a riwana-nonoemī!'

*Rava Natuna ana nei  
(Matthew 24:29-31; Luke 21:25-28)*

<sup>24</sup> Iesu wenanare i riwa, “Ma iniviara ġaeġaena au murina.

*Madeġa ēga ina rarana  
ma nawaravi ēga ina lalai. (Isaiah 13:10)*

<sup>25</sup> *Ma ubona marei ina peu  
ma rewapanana ġelaui au aidamo ina gui. (Isaiah 34:4)*

<sup>26</sup> <sup>✳</sup>—Nai maranaina, *Rava Natuna ana rewapanana ma ana borumana apauei ina nei.* <sup>27</sup> Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ġela au damona.”

*Damala ana awanaina  
(Matthew 24:32-35; Luke 21:29-33)*

<sup>28</sup> “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai. <sup>29</sup> Ma nanare, maranai wei kauai anatapui ina tuputupua, ona aramanei da

---

<sup>✳</sup> **13:26:** Da 7:13

Rava Natuna i turiai; au metaeta i ġetai. <sup>30</sup> Anina a ririwemi da wei kauai au naona ina tupua ma muriai da rava marina lawalawaii ina irāge. <sup>31</sup> Mara ma dobu ina amo. Wate riwau eġa ina amo.”

*Bada ainelana ana nei i aramanei  
(Matthew 24:36-44)*

<sup>32</sup> “Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amana, tauna ava i aramanei. <sup>33</sup> Ona vineneġana ma matami ina kala!† Eġa ota aramanei mara aiwai, wei kauai ina tupua. <sup>34</sup> Wei me rava ana numa i netawanei ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kauei. Ma tauvineneġana i riwei da ita vineneġana. <sup>35</sup> Ona vineneġana! Eġa ota aramanei mara aiwai, numa taniwagana e nenei; mepa da au bigai bo au nubautuva bo maratotomt Mai bo ubaubanai. <sup>36</sup> Ma eġa matamatavemi ina nelaġaimi. <sup>37</sup> Aiwai riwana a ririwemi, riwana tagogina rava anatapui a riwei, ona vineneġana!”

## 14

*Jew ai babada, Iesu i ogei da ita viraġeni  
(Matthew 26:1-5; Luke 22:1-2; John 11:45-53)*

<sup>1</sup> ✽ Au pom ruāga muriai da Raġona ma Palawa Bagibagina torelai,\* Pirisi babadai ma Tarawatu

---

† **13:33:** Wedau Evanelia i girumi, ma i raupari, wate buka wadubo nonoana wei eġa ita mamae, Luk 21:16 kampa ona inanai da e mamae.

✽ **14:1:** Exo 12:1-27      \* **14:1:** Raġona (passover) Exo 12:1 Palawa eġa yist maiteni (Unleavened-Bread) Exo 12:17 & 23:15

Babadai eta i baibaei da menanare govagovağanei Iesu ita vunui. <sup>2</sup> Ma i riwa, “Au torela wei kauai eğä tana kuae, mepa da viğaiğaiawa ğaeğena ina tupua.”

*Wavine, daji ğabuğabuna Iesu au kolana i wağı  
(Matthew 26:6-13; John 12:1-8)*

<sup>3</sup> Maranai Iesu au Bethani, Simon i ğoreğorei lepleperana ana au numa i kiala ma i amam. Wavine, wagi wavana alabaster i voai ma i ğeta ma wagi uana i vogai ma daji ğabuğabuna, maiana ğaeğena e ğoreğorei *nard*, Iesu au kolana i wağı. <sup>4</sup> Rava ğelaui kampa i mamae i ğaiawa ma i riwa, “Aiwai aubaina daji u vikalokaloei? <sup>5</sup> Wei dajina ita gimarei 300 *denarii* † ruvana ma manena molamolakai ita verei.” Ma taui, wavine i vienenei.

<sup>6</sup> Wate Iesu i riwa, “Ona voterei! Aiwai aubaina o vinuabolai? Tauna, kaua aiaina awariu i kuae.

<sup>7</sup> Molamolakai awarimi e mamae-nonoa ma ona ğoei ma taui ona voogui. Wate tau awarimi eğä ata mamae-nonoa. <sup>8</sup> Wavine ana nola i kuae. Tauna, dajiei tupuau i vokaukauana-nonoei vikokoaga aubaina.‡ <sup>9</sup> A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eğä nuuanuai ina vuru.”

<sup>10</sup> Judas Iskariotei tauna Apasol tagogi, Pirisi Babadai awari i ğeta da Iesu ita vibenabenamei. <sup>11</sup> Taui i vinuaiai kaua maranai wei i nonori ma Judas i parivainuağani da mane ita verei. Ma Judas

† **14:5:** Wei lamna me tabagibagi ana maia madeğä tagogi aubaina. ‡ **14:8:** Mai Jew ai kaua da taubeu dajiei e bulobuloi muriai au kokoaga e tereterei.

i 'nana da mepa gavogavo ita inanai da Iesu ita amverenei.

*Iesu ma Apasol, Raġona torelana i ani.*  
*(Matthew 26:17-25; Luke 22:7-14, 21-23; John 13:21-30)*

<sup>12</sup> Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukauei aubaim?”

<sup>13</sup> Iesu, taui ruaġa i riwei ma i paritawanei, “Ona nae au Jerusalem ma oroto, wairā wagina e avavarai ona inanai ma ona votaġotaġoi. <sup>14</sup> Au numana e ruiruiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?” <sup>15</sup> “Ma tauna, numa vatavatara ina viatajaiemi i vokaukauana-nonoei ma kampa aubaita ona vokaukaua.”

<sup>16</sup> Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

<sup>17</sup> Au i biga ma Iesu i nei Apasol maiteni. <sup>18</sup> Taui au kepakepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

<sup>19</sup> Tauvotaġotaġo i vinuabola ma tagotagogi ava i pa, “Eġa tau tapa?”

<sup>20</sup> Iesu i paribelei, “Taumi tagogi weka palawa e vivigaloi au aboma tau maiteni. <sup>21</sup> Wariaġa i girugirumia nanare, Rava Natuna ina iraġe. Wate aiai da Rava Natuna i vibenabenamei; tauna, kovogħa ġaeġaena ina vaia! I aii da alona avena ita vinatunei.”

<sup>22</sup> Maranai i amam ma Iesu palawa i vaia ma i viegualau, i vogimagimai ma Tauvotaḡotāgo i verei ma i riwa, “Ona vaia; wei tupuau.”

<sup>23</sup> Anina ma *wine* kelakana i vaia ma i viegualau ma i verei da anatapui i umei, <sup>24</sup> ⦿“Wei tau tarau i toi rava maḡamaḡaui aubai ma au parivainuaḡana bagibagina ina vovai-virewapani. <sup>25</sup> Anina a ririwemi, *wine* eḡa ana uma-melei da maranai God ana rava aubaii ana vigulau.”

<sup>26</sup> Ma taui voepaepa welana i ravi ma i ḡae au Ola *Olives*.

*Peter, Iesu ina boviei*  
(Matthew 26:31-35; Luke 22:31-34; John 13:36-38)

<sup>27</sup> Iesu, taui i riwei “I girumi nanare, God i riwa, ‘Tauviḡamoḡamo ana viraḡeni ma sипу ina vilamonei.’” (*Zekariah 13:7*)  
Ma nanare anatapumi ona ruba-tawaneu. <sup>28</sup> Wate au vomairi au murina ana aivinao au Galili.<sup>29</sup>

<sup>29</sup> Peter i riwa, “Mepa da anatapui ina rubatawanem, wate eḡa tau!”

<sup>30</sup> Iesu, Peter i riwei, “A ririwana-kauem da amadodo waguvvarai muriai da kokorereko ina tou mara ruaḡa; tam mara tonuḡa ma bovieu.”

<sup>31</sup> Wate Peter, ponana i bagibagi ma i riwa, “Avena mepa da tau, tam maiteni ana iraḡe. Eḡa melanai ana boviem!” Ma taui ġelaui riwana tagogina i latoni.

*Iesu au Gethsemani i raraupari*  
(Matthew 26:36-46; Luke 22:39-46)

---

⦿ **14:24:** Exo 24:8; Jer 31:31-34

<sup>32</sup> Ma au Gethsemani i ġeta ma Iesu, ana tau-votaġotaġo i riwei, “Weka ona kiala ma ana raupari.”

<sup>33</sup> Ma Peter, James ma John i taravaini ma nu-anuana i’raġe ma nuanuana i bola-kauei. <sup>34</sup> Ma taui i riwei, “Au nuabola i rata kaua au orau da e vunuvunuui. Weka ona mae ma ona vineneġana.”

<sup>35</sup> Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei. <sup>36</sup> I riwa i pa, “*Abba* Amau! Aiwai anatapuna tagotagogina tam awarim. Wei kovoġa kelakana ma vaitawanei. Wate eġa tau au ġoana, wate tam am ġoana.”

<sup>37</sup> Ma Iesu i nememei ma taui tonuġa rara-nuavurui i nelaġai. Ma Peter i riwei, “Simon! Š tam aiwai matavena? Mara aburuna uta vineneġana bo eġa?” <sup>38</sup> Ma Iesu, taui i riwei, “Ona vineneġana ma ona raupari da eġa au raelara ona peu! Arua e ġoeġoei, wate tupua i ġokokokara.”

<sup>39</sup> Ma i naeme ma parina tagogina i raupariei.

<sup>40</sup> Maranai i nememei ma i nelaġai, i matamatave; taui, matai i vitai. Ma taui eġa ita aramanei aiwai ita riwei.

<sup>41</sup> Mara vitonuina i nene-memei ma taui i riwei, “Taumi amapo ona matamatave ma laumi ina tautau? Anina! Mara i ġetai, ona inanai. Rava Natuna ina vibenabenamei ġo’apoapoe ravai au urai. <sup>42</sup> Ona vomairi; tana nae; ona inana! Tauvibenabenameu e nenei!”

*Iesu i pani*  
(Matthew 26:47-56; Luke 22:47-53; John 18:3-12)

---

§ **14:37:** Au Mrk 3:16 Simon wavana i virai da Peter.

<sup>43</sup> Iesu i bababani ma Judas, tauna ana Tauvotaḡotaḡo tagogi i ġetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai. <sup>44</sup> Muriai da Iesu awarina ita ġeta; Judas, patara ai mataira i verei, “Orotona ana vigia laḡolaḡonei; nai tauna. Ona pani ma ona naiei ma ona inana-kauei!”

<sup>45</sup> Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laḡolaḡonei. <sup>46</sup> Ma taui, Iesu i vojjini ma i pani. <sup>47</sup> Ma tagogi kampa i maimairi, ana sword i taina-lavui ma Pirisi ġeġetelarana ana taunola taniġana i borituuni. <sup>48</sup> Ma Iesu, taui i riwei, “Taumi ana apiami o nei da ota paniu bo, apamina tau amkwalakwalau? <sup>49</sup> Marana patapatai taumi maiteni ta mamae au Tempol ma a viararamana ma eġa ota paniu. Ma i girugirumia nanare, ina tupua.”

<sup>50</sup> Ma Tauvotaḡotaḡo anatapui, Iesu i voterei ma i ruba-tawanei.

<sup>51</sup> Ma laraga tagogi, i vikareko ma Iesu i votaḡotaḡoi. Taui i ġoei da ita vojjini, <sup>52</sup> wate ana kareko i vojjini ma tauna ana kovakovana i ruba.

*Taui, Iesu i etarei.*

*(Matthew 26:57-68; Luke 22:54-55, 63-71; John 18:13-14, 19-24)*

<sup>53</sup> Ma taui, Iesu i naiei Pirisi Ġeġetelarana. Pirisi Babadai, dogadogara ma Tarawatu Babadai mepa i vitagogieiana. <sup>54</sup> Ma Peter i votaḡotaḡo da Pirisi Ġeġetelarana ana numa. Ma ana au debadeba, purusimani maiteni i kiala ma i viviairara. <sup>55</sup> Pirisi Babadai ma mai Jew ai

boru ġeġetelarana,\* Iesu ana apoapoe i baiei da ita viraġeni; ma i baiana-avei. <sup>56</sup> Matamata maġamaġaui, Iesu i viwavu-morumoruei, wate ai viwavu taputapunei ava.

<sup>57</sup> Ma ġelaui i vomairi ma wei wavuna morumoruna i kauei Iesu awarina, <sup>58</sup> “Tauai a nonori tauna i riwa, Wei tempolna i voavoia. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai.” <sup>59</sup> Wate nanare ai viwavu taputapunei ava.

<sup>60</sup> Pirisi ġeġetelarana i mairi taui au naoi ma Iesu i vitara-virevirei, “Wei ravai e viviwavuim ma eġa aiwai ma paribelei bo?”

<sup>61</sup> Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaiainana Natuna bo?”

<sup>62</sup> ✝Iesu i paribelana, “Tau tauna! Ma Rava Natuna ona inanai, Vivirewapanana au oienā ina kiala ma mara ladanei ina nei.

<sup>63</sup> Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina matamata ġelaui tana ġoie? <sup>64</sup> Taumi, vijiboġa o nonori ma ami nota aiwai?”

Taui anatapui i riwa, “Tauna ana ġo’apoapoe aubaina anina da ina iraġel!”

<sup>65</sup> Ma ġelaui i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

---

\* **14:55:** Mai Jew e ġoreġorei Sanhedrin. † **14:61:** Isaiah i parivereta da Keriso ana au iraġe eġa ina gagaloana-melei. (Isa 53:7).

✝ **14:62:** Da 7:13

*Peter, Iesu i boviei  
(Matthew 26:69-75; Luke 22:56-62; John 18:15-18, 25-27)*

<sup>66</sup> Ma Peter au gabaura i mamae ma Pirisi ġeġetelarana ana taunola guguini i ġetai. <sup>67</sup> Maranai tauna, Peter i 'nanai i viviairara; ma i 'nanta-tunutunui ma i riwa, "Tam maiteni Iesu Nasaretei, ana tauvotaġoġo!"

<sup>68</sup> Wate tauna i bovi ma i riwa, "Eġa ata aramanei aiwai e bababaniei, a vinuanainei!" Ma i tuopu au metaeta ma [kokorereko i tou<sup>‡</sup>].

<sup>69</sup> Taunola guguini, Peter i 'nanai ma i raukarena-melei ma rava au ġereġere i maimairi i riwei, "Wei ravana, taui tagogi!" <sup>70</sup> Wate Peter i bovi me.

Mara aburuna muriai, taui au ġereġere i maimairi, Peter i riwana-melei, "Tam anina, taui tagogi; aubaina tam, Galiliei!" <sup>71</sup> Ma Peter i riwa, "God au matana, tau a ririwa kaua, ravana o ririweia a vivinuanainei!"

<sup>72</sup> Maratagogi kokorereko i tou mara viruaina ma Peter, Iesu riwana i notai - *Muriai da kokorereko ina tou mara ruāġa, tam mara tonuġa ma bovieu*. Ma Peter i vinuabola kaua ma i tou.

## 15

*Iesu i taravaina-naiei Pilate au naona  
(Matthew 27:1-2, 11-19; Luke 23:1-5; John 18:28-38)*

<sup>1</sup> Ubaubanai boibogħi, pirisi babadai ma dogadogara ma tarawatu babadai anatapui i viboru\* ma i vianina da Iesu i pani ma i veredamanei Pilate

<sup>‡</sup> **14:68:** Wei riwana buka au wadubo nonoana eġa ita mamae.

\* **15:1:** Mrk 14:55 Sanhedrin

au urana. <sup>2</sup> Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.” <sup>3</sup> Pirisi Babadai e viviwavuim kaua mağamağau aubai. <sup>4</sup> Ma nanare Pilate, Iesu i vitaraviravirana-melei i pa, “Tam ma paribelana bo eğä? Ma nonori e viviwavuim kaua mağamağau aubai!” <sup>5</sup> Wate Iesu i genuana ma eğä ita paribelei. Ma Pilate i ba kaua.†

*Iesu ana irağe i vianinei*

(Matthew 27:15-38; Luke 23:13-25; John 18:39–19:16)

<sup>6</sup> Taui ai kaua maemaena da Rağona Torelana au marana, Pilate, panipani tagogi, rava ai ġoanei e ruperupeni ma e vovoterei da e nena. <sup>7</sup> Orotu tagogi wavana Barabas; tauna Rome gabe-mani i viġavie i pani da panipani au numana i mamae. Ana rava maiteni tauvirağena. <sup>8</sup> Ma patara i ġeta da Pilate ita vibāgai da panipani tagogi ita rupeni Rağona Torelana au marana. <sup>9-10</sup> Pilate i paribelei, “Taumi o ġoeğoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina. <sup>11</sup> Wate Pirisi Babadai, patara i egari da Pilate, Barabas ita rupeni ma eğä Iesu. <sup>12</sup> Pilate, patara i paridadana-melei i pa, “Tauna o ġoreğoreia mai Jew ai gulau mena ana kauanei?” <sup>13</sup> Taui i garara, “Ma tuparatui!” <sup>14</sup> Pilate i riwa, “Aiwai apoapoena i kauei?” Ma taui i garara guratana, “Ma tuparatui!” <sup>15</sup> Pilate

---

† **15:5:** Mai Rome ai tarawatu e mamae da maranai i viwawuim ma tauerata eğä uta paribelei lamna tam anina wavu ma varai.

i ġoei da patara ita vinuaubai ma Barabas i rupeni ma sorodia i egari da Iesu i kwapui da i vitaratarai ma i naei da ita tuparatui.

*Sorodia, Iesu i vinamei  
(Matthew 27:27-31; John 19:2-3)*

<sup>16</sup> *Sorodia*, Iesu i taravaina-ruei Pilate ana au numa ma ai rava ġelaui i ġoreiai. <sup>17</sup> Ma gara lebalebarina<sup>‡</sup> [*me gulau ana gara*] Iesu i vioteni ma kunuteia ai donadonanei i viri da au kolana i terei. <sup>18</sup> Ma vinamana i raukarei ma i garara, “Equalau mai Jew ai gulau!” <sup>19</sup> Ma kolana gonuei i raviravi ma i ovaovai. Ma ae-tutuiei i mae-ġaira au doa ma i raudunelei ma i vivinamei. <sup>20</sup> Ma i vijiboġa vorovei ma gara lebalebarina i voġiġi-tawanei ma ana gara i vioteni. Ma i taravaina-opunei da ita tuparatui.

*Iesu i tuparatui  
(Matthew 27:32-44; Luke 23:26-43; John 19:17-37)*

<sup>21</sup> Tau i nenea ma Simon i nelaġai, rava Sairinie<sup>§</sup> (tauna Rufus ma Alexander amai). Simon wa-puei i nenei. Ma sorodia, tauna i egari da Iesu ana korosi i avarai. <sup>22</sup> Tau, Iesu i naiei da gabu i ġoreġorei Golgotha, lamna anona unu gabuna. <sup>23</sup> *Sorodia, wine* bunama *myrrh* maiteni i virai ma Iesu i veredadani, wate tauna i geduaiei. <sup>24</sup> Ma Iesu i tuparatui ma ana gara, taui ava au orai i ġutai.\*

<sup>25</sup> Ubaubanai 9 kilok nanare, Iesu i tuparatui. <sup>26</sup> Aniviwavuna i girumi ma i tutui, “Mai Jew ai

---

‡ **15:17:** Eng. purple. § **15:21:** Eng. Cyrenian. \* **15:24:** Taui ġaima i tawanei me dice da aiai aiwai garana ita vaia.

gulau.” <sup>27-28</sup> Danedanenei ruağā, Iesu au ririvana i tuparatui; tagogi au oiena ma ġelauna au kelake-launa.†

<sup>29</sup> Taubabara, kolai i kwajikwajie i Iesu i vivinamei, “Na! Tam Tempol taurikaina ma au pom tonuğā ma voa-melei. <sup>30</sup> Ma vilawana-melem ma korosiei ma ġairai!”

<sup>31</sup> Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelaui i vilawani, wate ainelana ita vilawana-melana-avei. <sup>32</sup> Keriso Tauvilawana, Israel ana gulau; marina korosiei ma ġairai ma tana inanai da tana vitumaġanei!” Danedanenei i tupatuparatui maitenai, Iesu i vinamei.

### *Iesu ana iraġe*

(Matthew 27:45-56; Luke 23:44-49; John 19:28-

<sup>30</sup>)

<sup>33</sup> Ma au benai dobu anatapuna i waguvarei da 3 kilok au bigai. <sup>34</sup> Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*” <sup>35</sup> Ma rava ġelaui au ġereġere i maimairi i nonori ma i riwa, “Ona rautaniġanei, Elijah e kwatukwatuei!” <sup>36</sup> Ma rava tagogi i ruba da gara ai au damona i pani ma au *wine* tomatomana i vigaloi ma i voepai Iesu au ipirina ma i riwa,‡ “Ona vipaipai ma tana inanai mepa da Elijah ina nei da ina tereġairei.” <sup>37</sup> Ma Iesu ponana i rata ma

---

⊕ 15:27-28: Isa 53:12   † 15:27-28: Giruma ġelaui waduboi vs 28 e mamae Ma aiwai i kaukaueia lamna peroveta i ririweia i tupua, Taui i ’nanai me taui ġo’apoapoe taukauei. Isa 53:12   ⊕ 15:29: Mrk 14:58   ‡ 15:36: Psa 69:21 peroveta i girumi da Keriso ita verei.

i kwatu ma i lavutu tawanana. <sup>38</sup> Ma Tempol au orana aniteregāgara au pouna i wanasikai au tepana dai i ġaira au doa. <sup>39</sup> Ma sorodia ai bada, Iesu au naona i maimairi; i ’nanai da i lavutu tawanana ma i riwa, “Wei anina God Natuna.” <sup>40</sup> Waivine ġelauui ueia i mae ma i raraubiga: Mary Magdalene ma Mary (James keikeina ma Joses<sup>§</sup> aloi) ma Salome. <sup>41</sup> Taui, Iesu i votaġotāgoi ma i vovoagui maranai au Galili i mamae ma waivine ġelauui maġamaġaui, tauna maiteni i ġeġae au Jerusalem, anatapui kampa.

*Iesu i vikokoagei  
(Matthew 27:57-61; Luke 23:50-56; John 19:38-42)*

<sup>42-43</sup> Ma au biga i tuturiai Joseph Arimatheaei\* tauna rava ġaegħena tagogi boru ġetelarana au orana. Tauna God ana vigulau ana nei i vipaipaiei. Ma yokaukaua marana (Lamna Sabat au naona)<sup>†</sup> ma Joseph ana tepatorana, Pilate awarina i rui ma Iesu taubeuna i vibaqei. <sup>44</sup> Pilate i baiei da Iesu boibogi i’raġe. Tauna, sorodia ai bada i kwatuei ma i vitara-virevirei da Iesu i’raġe bo eġa? <sup>45</sup> Maranai sorodia ai bada i pariverei da anina riwa kaua. Ma Pilate, Joseph i riwei da Iesu tupuana i vaia.

---

§ **15:40:** Au Mat 27:56, Matthew i girumijoseph ma eġa Joses.

\* **15:42-43:** Eng. Arimathea. † **15:42-43:** Mai Jew ai Sabate, madeġa e neneulai au Friday e vivikarei da madeġa e neneulai au Saturday e kwakwa. Mai Jew ai Tarawatu e ririwa da rava i ’raġe lamna marana tagogina ina doboi. Sabate amadodo madeġa e neneulai ina vikarei lamna aubaina Joseph i volaġilaġina da Iesu taubeuna ita doboi.

<sup>46</sup> Joseph, gara maiana ī gimarai ma Iesu tupuana i tere-ḡairei. Garei i umai ma au guba tupuana i vimataveni ma ḡaima ī gaeḡaena i kaipeuri da kokoaga metaetana i vaitomeni. <sup>47</sup> Mary Magdalene ma Mary - Joses alona i 'nanai mepa Iesu taubeuna i vimataveni.

## 16

### *Iesu i vomairi*

<sup>1</sup> Ma Sabat au murina, Mary Magdalene ma Mary - James keikeina alona ma Salome, bunama ḡabuḡabui i gimarai da i naiei da Iesu tupuana ita buloi.\* <sup>2</sup> Ma Sunday ubaubanai boibogī maranai madeğä i gogogo, taui i nae au kokoaga. <sup>3</sup> Ma i nenaе ma i bababani, "Aiai aubaita ḡaima kokoaga au metaetana ina kaipeura-tawanei?" <sup>4</sup> Maranai taui i taepai, i 'nanai da boibogī ḡaima i kaipeura-tawanei - ḡaima ī gaeḡae kaukauana. <sup>5</sup> Maranai i rui au guba ma oroto laragana ana gara ararapoirina i 'nanai au oienat.† Ma taui orai i aeupai. <sup>6</sup> Orotu laragana i riwa, "Eğä orami ina aeupai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eğä weka! Taui weka taubeuna i vimataveni. <sup>7</sup> <sup>8</sup>Marina ona nae ma ana tauvotaḡotaḡo ona riwei, ma Peter eğä nuanuami ina vuru da Iesu e vivinao au Galili. Kampa ona inanai i ririwemi nanare." <sup>8</sup> Taui i opu ma kokoagei i viruberubei ana ini sisisi

---

\* **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ḡoei da wei kauai ita votaḡotaḡoi. † **16:5:** Tupua i vimataveni au oienat i kiakiala, ana gara ararapoirina. <sup>8</sup> **16:7:** Mrk 14:28

ma ana rovoi. Taui i rovo kaua, lamna aubaina eḡa rava ita riwei.

*Mark 16:9-20*

*Mark Riwana Aiaina damona lamna wariāga i vine-boai. Ma rava ġelauna aiwai i notanotai nanare au vs 9 da 20 i girumi. Wei damonana weka i vikarei.*

*Iesu, Mary Magdalene awarina i eḡa*

<sup>9</sup> Iesu iraġelei i vomairi me au Sunday ubaubanai boibogi ma i ainae da Mary Magdalene awarina i eḡa. Maraotai Iesu, Mary awarina arua-apoapoei seven i viopuni. <sup>10</sup> Iesu, ana tauvotaḡotaḡo i vivinuabola ma i toutou ma Mary i ġeta da i pariverei. <sup>11</sup> Ma Mary i pariverei da Iesu i lawana me ma tauna matanei Iesu i 'nanai. Wate taui eḡa ita vitumaḡanei.

*Iesu, tauvotaḡotaḡo ruāḡa awari i eḡa*

<sup>12</sup> Wei au murina Iesu inanana tapuna ma ana tauvotaḡotaḡo ruāḡa awari i eḡa; maranai taui i nenaue au melagai. <sup>13</sup> Taui i naeme ma tauvotaḡotaḡo ġelaui i vieġei. Wate taui nanare eḡa ita vitumaḡanei.

*Iesu, Taui 11 awari i eḡa*

<sup>14</sup> Muriai taui 11 i amam ma Iesu awarii i eḡa. Ma i eni aubaina taui orai i bado ma eḡa ita vitumaḡana maranai rava, i riwei da Tauna i vomairi me. <sup>15</sup> ✧Iesu ana Apasol i riwei, "Ona nae dobu au anatapuna. Ma God Riwana Aiaina ona jimei rava anatapui awarii. <sup>16</sup> Aiai da i vitumaḡana ma i babataito; tauna ina lawana. Ma aiai da eḡa ita vitumaḡana ina kovoġi. <sup>17</sup> Ma taui aiavoi da

---

✧ **16:15:** Act 1:8

i vitumaġana, rewapani ina verei da kaua babai ina kauei. Ma arua-apoapoei ina viopuni ma pona tapunei ina babani. <sup>18</sup> Taui, mota uraiei ina vaia ma waiawa ina umai ma eġa ina rauputei. Ma urai doridoriai au kolai ina terei ma ina lawana.”

*God, Iesu i ġaiei au Mara*

<sup>19</sup> ✝BADA Iesu, awari i babani vorovei. Ma tauna i ġaiei au mara ma God au oienā i kiala.

<sup>20</sup> Tauvotaġotaġo i opu ma dobu au anatapuna i raraugugula. Ma BADA, taui i voagui ma kaua babai i kaukauei da tauvotaġotaġo aiwai i bababaniei i vovai-virewapani.

**Wedau Mark**  
**The Gospel of Mark in the Wedau Language of Papua**  
**New Guinea**  
**Buk Mak long tokples Wedau long Niugini**

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

---

PDF generated using Haiola and XeLaTeX on 11 Nov 2022 from source files  
dated 9 Oct 2020

aa19f3e3-98fb-51fa-9c53-3906edc75f11